

豐縣志

卷十二 藝文類上

地 220.35
39
=7

豐縣志卷十二

藝文類上

其屬曰奏疏曰記曰序曰銘曰頌曰贊曰碑曰文曰志曰詩曰歌曰詞

志之有藝文所以紀事實資攷覈焉故凡有關於風教者並得書雖非邑人所著均得兼載義取徵信而已

奏疏

國朝海明

請築攔黃堤疏

奏為敬陳管見仰祈

聖鑒事竊臣荷蒙

天恩巡視東漕并司運河挑濬興築事宜茲自德州至南陽一路工程均已告成南陽以下碎石堤工亦現在

豐縣志

卷十一

藝文類

一 奏疏

備辦將竣東省運河水勢深通糧艘進行無阻臣沿河細察情形苟耳目之所及有裨于漕務民生者必留心體訪竊見東省水患由微山湖之漲溢而微山湖之漲溢由黃河北岸之內灌上厓

宸衷

恩旨屢下並允諸臣所請挑挖伊家河開浚八閘月河以

籌其去路復經臣會同河臣張師載撫臣阿爾泰

奏請將黃河灘面溝漕填築亂石壩又經兩廣督臣陳

弘謀

奏請將無堤之七十里接築堤工欽奉有數年後再看之

諭旨

睿慮周詳既明且盡而臣一得之愚有亟宜爲我

皇上陳者竊查黃河自河南而來兩岸相距甚遠灘面寬濶水有容納一至徐州兩山夾鎖堤工亦漸束漸窄若將此七十里全築堅堤每遇盛漲固爲宣洩無路然就今日微山湖而論十數年前茶城之北卽係湖崖旣深且濶容納亦多乃頻年以來黃水日漸內灌沿湖日漸停淤現在湖水已離茶城十數里不等水內又係淺灘一望瀰漫以致湖水不能容納于南自然泛溢于北沛縣魚濟濱湖一帶民社田廬易淹難洩並運河緯道堤工均被漫刷今若仍聽黃水入湖

豐縣志

卷十一

藝文類

二 奏疏

不爲節制不惟巨涸之田地難保不淹已修之工程難保經久且恐不數年間微山湖勢必淤平不特不能蓄水濟運泲河且受其淤泲河再淤東南皆山不能另開河道其有關於運道民生者實匪淺鮮臣往來韓庄熟視形勢再四思維臨黃旣不便築壩而湖身又不可以受黃欲求無碍于江南務期有裨于東省惟有微湖之南圈築攔黃堤工自大吳家集接舊有遙堤處起經灣兒集鄭家集茶城至內華山止約六十餘里築堤一道頂寬二丈底寬六丈高一丈卽以取土方塘挑成順堤河形導入荆山橋出貓兒窩入運并于內華山西微湖尾間建雙金門通湖閘一

座黃漲則閉漲退則啟以備蓄洩計需銀在十萬兩之內查築堤之處相距黃河三四十里灘面寬廣是水漲足資容納矣界荆山橋于堤外以爲歸宿之路是水漲足資宣洩矣挑成順堤河形由荆山橋入貓兒窩入運堤外一切溝港坡水均可由此東注則灘地既無水患並可爲江省濟運之資矣雖不使之入湖而黃漲之時分洩仍舊則徐城可無隱憂矣是皆無碍于江南者也至於東省運河春夏需水之時並非黃河出漕之候原不借黃濟運若謂蓄之伏秋放之春夏查伏秋之時各河水發入湖者多如西來河南之武陟直隸之東明汝黃堤外之順堤河又如北來曹單鄆城鉅野之坡水嘉祥之柳涑濟甯之舊運牛頭等河又如東來之汶泗府洗玉泉薛沙等河其爲微山一湖之灌輸者不一而足更不需有害無利之黃水況內華山議建閘座尾間原屬相通萬一旱乾湖涸或值黃漲原可啟放而入並非內外阻隔是得此攔黃一堤黃水仍免內灌滕沛魚濟一帶民社田廬未涸者可望漸涸已涸者可免復淹運河已修之緯道等工可以不受黃水之患而東南數百萬天庾遄行無滯矣是皆大有益于東省者也臣竊見我皇上心殷利濟宵旰憂勤是以殫精竭思通盤籌畫謹抒一得之愚以備

聖明採擇是否有當伏祈

皇上睿鑒訓示施行謹

奏

合詞覆奏築黃攔堤疏

臣

劉統勳臣 裘曰修臣 尹繼善臣 白鐘山謹

奏爲敬陳籌辦築堤情形仰祈

聖訓事乾隆二十三年四月三十日奉

上諭據巡漕給事中海明奏稱東省水患由微山湖之漲溢而微山湖之漲溢由黃河北岸之內灌請於微山湖之南圈築攔黃堤工卽以取土方塘挑成順堤河形導入荆山橋出貓兒窩入運並於內華山西建築通湖閘

豐縣志

卷十

藝文類

四

奏疏

座以備宣洩等語只見悉心籌畫黃河由豫入徐兩岸夾束河身甚狹每潰決爲銅山諸邑害則漫延而入於金鄉魚臺今徐城已增築石工足資捍禦而山東之濱湖州縣民舍田廬不免仍成巨浸孰非吾赤子而忍坐視果使民生永獲安全卽多費帑金朕所不惜且年年蠲賑所費不更無已耶但是否寔有裨於東省而於徐郡兩岸亦不致另生險工或究不如於北岸無堤處所接築堤工之爲得計着尙書劉統勳馳驛前往會同尹繼善白鍾山逐加閱勘詳籌妥議請旨辦理欽此日修如尙在河干着一併會同查辦欽此欽遵臣等伏查黃河北岸上年因慮漫水過多當將花庄溝槽築做

碎石填工本年春於議覆善後事宜案內又將各處
土填改填碎石並接築土堰臣等遵

旨節次查勘無非欲使黃水有所節制而又恐束之太驟
致生他險也今海明請於微山湖南圍築攔黃堤並
挑挖順堤引河導由荆山橋入運是原爲攔黃起見
但攔之於微山湖邊不若攔之於黃河北岸恭誦

諭旨於北岸無堤處所接築堤工之爲得計

聖謨廣遠洞悉機宜臣等所當欽遵辦理者也今勘得黃
村填起至大谷山止計程六十里應築土堤長一萬
五百餘丈高以六尺底寬八丈估需土方銀六萬餘
兩其所築之堤相度地勢之高下與河形之紆直總

豐縣志

卷十二

藝文類

五

奏疏

以離河十里內外爲度庶地面寬濶得以平衍容納
不致沖擊堤工其自大谷山至蘇家山計程二里則
逼近河身恐生他險且兩山夾峙地勢高亢原無庸
築堤查舊有石填基址應行修整俾平常之水不致
工灘縱遇異漲漫填而過亦止由荆山橋歸運該處
相距微山湖四十餘里且在下游斷不致涓滴復入
湖內如此通盤籌辦在東省旣收保障之益而江省
亦無可另生險工之虞矣所有議築堤工臣等現在
遴委多員發帑備辦務期迅速如式完竣以仰副
聖主慎重河防奠安民生至意臣等謹合詞具摺繪圖恭
奏是否有當伏乞

皇上睿鑒訓示謹

奏乾隆二十三年五月十七日奏二十五日奉到

硃批如所議行欽此

敬陳河工未盡事條奏

陳弘謀

奏為敬陳河工未盡事宜仰祈

聖鑒事江南地濱江海山東河南諸水皆由此會歸于海全仗幹河支河節節通流始無浸溢之患奈河道日久淤塞層層阻淺水到之處四溢旁流淹及民田年復一年疊被水災恭遇

皇駕南巡目擊被災情形洞鑒全河形勢

特頒諭旨發帑興修以除水患臣等仰遵

豐縣志

卷十一

藝文類

六 奏疏

聖訓往還查勘通體興修原估應挑之河應建之閘已于歲內完工續估之工亦于二三兩月告竣凡山東沂河之水則由駱馬河出六塘河于海州歸海山東運河之水則由鹽河亦于海州歸海其由河南而來者均由洪澤湖入高寶等河越應河入閘南行則于芒稻閘歸江以達海東行則于鹽城之范公堤出閘歸海中間幹河支河均已節節開通以次順流矣惟地勢高下不齊河水大小不一各河容納多少限于地勢亦難豫定尚須隨時經理方免水不為患臣擬於工程全竣之後奏請入

觀面領

聖訓然後漸次經理今蒙

聖恩補授兩廣總督又奉

硃批卽赴新任所有未盡事宜未得詳細面奏謹爲

皇上一一陳之

一此次所挑之河不下一百數十處多屬舊口河身加以挑浚新開之河不過十之一二此等舊河有于雍正年間疏浚者有于乾隆年間疏浚者止因日久未挑水淤沙停年復一年漸致淤淺幾成平地今已節節開通又復酌加寬深可期永資宣洩然必須年年挑浚方免日久淤塞淺阻益隨淤隨浚爲力尙易日久方修費必重鉅惟令官民皆有責成利害相關

豐縣志

卷十二

藝文類

七

奏疏

方不致視同局外坐聽淤淺請將所挑各河近黃運河者歸于河員經管隔遠無河員者令州縣及該地方同知佐貳經管分清界限每年秋後水落會同查勘有淤淺者會同州縣分清段落酌令附近田地民人合力挑浚年底將某河已經挑浚某河不須挑浚造冊報院院委道府人員於春間覆勘結報有應挑浚而不挑浚者將經管各官揭叅此等年年挑浚之費照例田主給食佃戶出力果有大段阻塞及工大費重者詳請估計

題明動帑辦理至堤閘損壞不改建另築者照此一律分別辦理則逐年挑浚可保永遠通順決不致日久

阻塞矣

一地方廣濶所挑之河每縣不過一二處或止一處皆係一縣之幹河止能洩近河之水其不及洩之水尙多請俟今年河水通流之后督令民間自行開浚支河小溝以達于所開之幹河小民見水有去路自必樂從再各處均有道路路旁原有小溝不甚通順應于秋冬督率人民將境內路旁之溝挑深使之通達卽以所挑之土平墊道路路漸高而溝漸深平地之水由道旁之溝順歸幹河田禾免淹行人稱便處處如此遠近曲折水皆通流溝洫之制卽兼行于其間矣

一淮徐海境內地土非盡瘠薄可以種植地土一望無際祇因河流未通一遇天雨是處瀰漫或廣種而薄收或有種而無收一年妄費工本次年遂棄而不種所以民間土地不甚植錢亦不甚愛惜年年望賑於官地皆曠土民習游惰今幸河流疏通水有去路尙宜各開溝洫以備蓄洩旱潦無虞如有地處窪下所開之河尙有不能盡洩之水則卽以開挑溝洫之土加築圩圍安砌涵洞隨時蓄洩以成圩田乾隆九年督臣尹繼善酌定圩圍溝洫條規奏請舉行彼時揚州之高寶等縣淮安之山陽等縣所築圩田至今皆成膏腴已有成效因河流未盡通暢雖築圩圍水

無去路仍被潦漫遂仍不肯多築圩圍今河水通流
洩水比前大暢臣等現在會奏仍照臣尹繼善原奏
開溝築圩次第經理惟是此等地方連次之後民力
拮据貧富不一難于合力築圩臣請自今年水過之
後于秋冬爲始地方官親身往鄉相度地勢勸民築
圩開溝有無力者仍照乾隆十一年河臣高斌等奏
准借給銀兩助其飯食勒限一年築成之后所借工
本分三年還官有一年之限築圩開溝不至中途而
廢棄有三年之限則田已有收民間繳還亦易現在
徐州府知府劉瑛淮安府知府五諾鹽海州知州李
永書盡心此事堪以辦理也

一各河開通之后上游之水由高而下可以遞層宣
洩內有地處窪下平日原係湖蕩止能受水不能通
流今雖開河節節相通若與去路地勢相平或更有
仰盂倒樣之勢此必不能免于淹漫者就下江現在
形勢而論如運河之水來源或大則邳州境內不無
受淹之處海州歸海之五圖寺河如遇潮漲沙淤則
海州沭陽境內之窪地不無受淹之處河南濰河淮
河之水較前已盛洪澤之水驟難下洩必停積于歸
仁堤以北所有宿遷睢寧桃源三縣境內窪地亦不
無受淹之處淮揚運河高郵等埧過水較早范公堤
地勢較高開水又能暢流則高郵興化泰州境內窪

地不無受淹之處洪湖五埧過水過多由寶應湖高郵等湖漫過運河各埧之水盡皆東流芒稻等閘歸江不及則高郵寶應興化各境內不無受淹之處此非河流之不順實由外水高于內河形如釜底地勢使然非人力所可強臣請使今年水過之后看其水勢宣洩如何果有必不能免于淹漫則將此等田地勘明頃畝減除糧賦有可以種植葦草者改照蘆課輸納聽民間採取資生雖曰棄地與水而仍爲近水居民資生之計如水深不能種葦者另爲設法安頓俾民免于失業以棄爲取究竟所棄者出則已多矣再此等低窪之地現已開有水河一道遇水落河仍

通流倘得消涸稍早仍可種植春麥每年得收一麥亦可資生仍不致全棄也

一黃河在河南孟縣以上兩山夾流不用築堤歷無水患自孟縣以下由江南以抵海口全賴兩岸堤工捍衛岸寬者則築遙堤岸近者不得不臨河墜築縷堤江南徐州府銅山縣境內近山者亦卽以山爲堤惟北岸自李家莊起至徐城之蘇家山計九十里而無堤岸河臣靳輔曾經題明接築遙堤未及興工迨后接築二十里至今尙有七十里未曾築堤歷年河水漫溢灘地北岸田地皆以受淹議者以爲黃河南岸逼近徐城故北岸留此數十里無堤聽其泛溢

以衛徐城因此不復防護以至乾隆二十年孫家
漫口其渾水直趨東南將微山等湖及荆山橋等河
淤成平地至湖水不能宣洩銅山沛縣皆受淹浸其
患皆由於此上年仰蒙

聖明洞鑒

特命侍郎夢麟等竭力開濬湖口之茶城小梁山等河又
開挑荆山橋河多方疏浚自去冬各河開通湖水得
以暢流田地方始涸出自此以後黃水決不可再令
東漫則黃河北岸不便再任無堤利害已明臣曾沿
河查勘凡所無堤之處現已衝成小河斷港其情形
危險可虞歷年挑浚微山等湖水口咽喉及荆山橋

豐縣志

卷十二

藝文類

十一

奏疏

以下之河費帑不少倘無堤之七十里內再有一線
漫流渾水直射東流湖河定見淤塞前工盡棄爲慮
更大臣查此七十里河岸近則七八里遠則十數里
若就稍高平地接築遙堤以爲外衛黃河水漲聽其
出灘漫流僅及堤根而止水緩則沙積堤遠則水平
一俟河水落后漫灘清水仍歸河中不但不能爲慮
且可冲刷河底此江南黃河最要之策而於徐城一
帶最相宜者也臣恭聞此堤欽奉

上諭另行辦理今各河均已疏浚又徐城南岸已築石堤
石堤之對岸有子房山獅子等山爲岸徐城可以無
慮此七十里之河岸亟宜築堤以結通河全屬遙堤

既築之後再就堤內衝出之小河斷港疏浚成河遇有雨水可以引入湖中此數十里民田永無被淹之患矣所築遙堤交于河臣督臣估定派河員於三月以後分段堅築此一帶窮民於各河完工之后又可接築此堤以資食力亦兩便之道也

一下河一帶民田全以范公堤爲捍衛堤內皆係民田堤外皆係軍地取草煎鹽倘遇海潮漲盛之年全仗此堤方免內浸自宋至今永資捍衛所關甚鉅臣沿堤而行此堤日久坍塌單薄殊甚愚民於水漲時希冀水由外洩輒挖破此堤洩水隨后雖爲補築不過取堤根之土虛鬆填滿又無夯礮現在決口甚多

豐縣志

卷十二

藝文類

十三 奏疏

堤不過數尺堤上堤根又爲民間葬塚與無堤等倘遇海潮漲盛若無堤高寶鹽城各縣亦受潮災此堤於目下似無關係而實經久捍衛不可廢棄之要工也臣抵揚州於鹽臣高恒商及此堤高恒亦意爲應行堅築相約春初親往查勘然后會奏伏乞

皇上勅諭鹽臣勘明估計動項派員分年如式修築務期高寬堅築通體完固永資捍衛至於堤內水漲勢瀕穿堤外洩棄已層層建閘以時啟閉其鹽城以牯河以洩水歸海較順者河臣于督臣是在于可以洩水之處開挑引河添建石閘臣亦就所見札商辦理自此以后外禁挖堤放水其如何責成閘官分管保護

亦聽河臣鹽臣會同商辦也

一下河之泰興如臯地方近海草地不能耕種離海稍遠之地又止種植襍糧兩縣境內有寶之河老龍河又如臯縣南有龍游河皆洩水歸江年久淤淺阻塞水無去路前歲泰興如臯等縣曾被水災皆因於此從前地方官久請開浚因孤民修無力而止應請自如臯寶之河起接泰興之老龍河又開龍游河直達于江則雨水有所宣洩遇旱可資灌溉向種襍糧之地可以改種稻向由有溝洩今皆通順所出稻穀於灶戶民食有益又可由泰興通行舟楫以抵秦州百貨亦可通流矣

豐縣志

卷十二

藝文類

十三

奏疏

上諸條皆開永除水患爲河工案內未盡事宜曾與欽差督河諸臣面爲商及意見大概相同原擬于工竣后會奏今臣赴粵謹繕摺具奏是否可採伏乞

皇上聖訓遵行謹

奏

昔在帝堯光有四海元首萬邦時則舜禹稷禹佐命垂統股肱天下聖德未衰而內禪元臣繼天而受命四姓承休迭有中邦五神還運炎德復起周道削滅秦德暴戾皇天疇庸審厥保承乃命唐帝之後振而興之又俾元臣之後翊而登之所以紹復丕績不墜厥祀故曲逆起爲策士輔成帝圖吐謀洞靈奮竒如神舜之胄也汝陰脫帝密網摧虜暴氣扶乘天休運行嘉謀禹之苗也鄘侯保綏三秦控引漢中宏器廟度以大帝業高之裔也淮陰整齊天兵導揚靈威覆趙夷魏拔齊殄楚平陽破三秦虜魏王絳侯定楚地固劉氏皆稷之裔也克復堯緒昭哉甚明天意若曰

豐縣志

卷十二

藝文類

十四

記

建大德者必唐帝之胄故漢氏興焉翼炎運者必唐臣之孫故羣雄登焉是以高帝誕膺聖祚以垂德厚探吳窮之輿旨載幽明之休祐殺白帝於大澤以承其靈建赤旂於沛邑以昭其神假手於嬴以混諸侯馮力於項以離關東奉纘堯之元命而四代之後咸獻其用德乘木之大統而秦楚之盛不保其位旣建皇極設都咸陽撫征四方訓齊天下乃樂沛宮以追造邦之本乃歌大風以昭武成之德乃奠舊都以壯王業之基生爲湯沐之邑沒爲思樂之地且曰萬歲之後魂游於此惟茲原廟沛宮之舊也祭蚩尤於是庭而赤精降導靈命於是邦而羣雄至登布衣於萬乘而子孫得以纘其緒化環堵爲四海而黎元得以安其

業基岱岳之高源洪河之長蓄靈擁休此焉發跡蓋以道
備於是而後行之天下制成於是而後廣之宇內天下備
其道而神復乎本宇內成其制而心懷其舊宜其正名以
表功用成其始俾生靈盡其敬焉陳本以宅神用成其終
俾生靈盡其慕焉故高帝定位建茲闕宮惠皇嗣服爰立
清廟繇越千祀至今血食此所以成終而成始也且夫以
斷蛇之威安知不運其密用佐歲功以流澤歟以約法之
仁安知不流其神睠相舊邦之遺黎歟以紹唐之餘慶統
天之遺烈安知不奮其神化大祐於下土歟然則展敬乞
靈烏可已也銘於舊邑以廸天命其辭曰蕩蕩明德時維
放勳揖讓而退祚於後昆羣蛇輔龍以翊天門登翼炎運

豐縣志

卷十二

藝文類

十五

記

唐臣之孫秦網旣離虺駭東夏長蛇封豕蹈躍中野天復
堯緒鍾祐於劉赫矣漢祖播茲皇猷揚旂沛庭約從諸侯
豪暴震疊威聲布流總制虎臣委成良疇勦殄霸楚遂荒
神州區宇懷濡黔黎輯柔表正萬國炎靈用休定宅咸陽
以都上游留觀本邦在鎬如周穆穆惠皇宗禋克成崇崇
滄宮清廟是憑原念大業肇經茲地乃專元命亦舉嚴祀
建旂疊鼓遂據天位魂游故都永介丕祚煥列唐典嚴恭
罔墜勒此休銘以昭本始

高皇廟記

宋

王文昌

邑人

漢高皇帝以布衣提三尺劍有天下世祖光武出應圖讖
起南陽之師遂復帝業皆撥亂之主也用能開基西京延

祚四百年二十有四君推本而言皆豐人也豐有五代所
建漢廟殿分前後規模精完邑人因之以至於今後殿神
位趙隱魯元之類且猶立像而帝自孝惠以降訖於東漢
一無所見雖當時設意鄙近亦豐人之闕典也豐人奉漢
祠甚嚴每以注意久之未決淄川韓侯博雅好古宣和辛
丑出宰豐邑祇謁漢廟觀後殿摧壞慨然憫之視事未幾
有重修殿宇尊奉神像之言與邑人之意合焉衆聞而謀
曰昔太上皇在關中嘗以豐爲念高帝萬歲後魂魄猶思
沛其後聖子神孫相繼而立安知不歸附其先於是祠哉
詎愬然不爲崇奉之計成夙昔之志以享神之福耶於是
將仕郎王之才筮日鳩工鼎新革故土木增麗而殿亦告

豐縣志

卷十二

藝文類

六

記

成以九月三日奉安神坐則遷舊像五位於前殿而加彩
繪焉後殿則以太上皇昭靈夫人居中而列聖環置于四
傍有以武功創業者有以文德守成者衣冠嚴整穆穆雍
雍使人望之肅然矣神之聯位也二十四君如處乎一家
人之瞻仰也四百餘年如覩乎一日歲時賽禱則休祥嘉
瑞將駢集響應以福我豐人矣鏤石而揭之用以告後人
時宣和三年十月二日

漢高祖廟碑記

景泰三年

明

劉昂

史稱漢高皇帝沛之豐邑中陽里人也生而神異夫神人
之生異於常人理固然也當秦并六國虐海宇始皇盡棄
先王之法自以爲子孫萬世之規帝奮起布衣提三尺劍

縱徒斷蛇英雄陳力席捲三秦驅除僭亂困楚滅羽不五載而蒞中國撫四夷革命創制肇大業四百二十餘年凡稱治三代之下者必曰漢噫帝之功德加於當時垂於後世何其盛哉考諸禮經有功德于民則祀之此豐邑所以有廟我朝所以命有司歲時祀享焉廟基帝產之處也歲久幾經典廢今縣幕劉君計諸同寅詢于父老掄材訓工踰月而成對越之頤庶足以展誠敬達靈貺也或謂帝尊爲天子富有四海居九重茲廟似不足以格神殊不知帝生於茲長於茲飲食嗜好遊觀娛樂皆茲土之所資且嘗曰吾萬歲後魂魄猶思沛今帝陟方雖久其神寧不奠於茲乎謹爲詩俾豐人歌之以享帝云

豐縣志

卷十二 藝文類

十七

記

漢高祖廟記

明秦紘單縣人

世傳漢高祖豐生沛長按本記亦云高帝起於沛豐則世傳未爲無據也豐縣舊有原廟志云創自五代正統八年典史劉勉重修自是而後曰就頽敝弘治十一年于侯來尹縣視篆越三日遍謁神廟至此惻然乃謂僚屬曰禮有功德于民者祀之漢高帝生於是邦提三尺劍誅無道秦拯生民於水火開四百餘年王業澤被當時功垂後世是以我朝於京都建歷代帝王廟歲時祭享高帝與焉蓋取其功德之在民也豐縣有廟乃重其所自生之地今廟貌如斯固不足以揭虔妥靈亦豈體承聖朝崇重古先哲王之盛意乎慨然興修爲已任縣丞宋溥典史查俊教諭陳

讓訓導吳轍鄭發暨諸耆民亦皆樂從乃選委官陳達壽
官李貞督工修建侯心恐煩民力役借於農間財用出自
區畫經始於弘治己未四月落成於弘治庚申三月民不
告勞事得就緒正殿三間中像龍顏隆準望之儼然兩廡
六間前闢大門三間外繚高垣百堵輪奐完美規模改觀
其基址在城內東北隅延袤共七百步有奇既訖事凡百
供祀器用無一不備所乏者花罌耳求之惟艱翌日治廟
傍隙地於內掘獲白磁二罌制度奇古非近代物也人皆
以爲神昭靈貺是固不偶然矣侯乃謁予爲記予惟高帝
功德具載漢史固不容喙但以史稱高帝不好儒術高帝
嘗自謂安事詩書此則不可不辨夫非高帝不事詩書也

豐縣志

卷十二

藝文類

十八

記

秦法偶語詩書者棄市是以當世之人劫於威虐以詩書
爲刀礮滔滔者皆是也高帝旣爲秦之民焉能抗秦法乎
其後暴秦雖滅高帝已鏹于積習矣不事詩書無怪其然
也亦非不好儒也世無真儒若鄴生者當時一庸流耳肩
飾儒冠掉三寸舌以干諸侯其視席珍待聘者有間矣惡
在其爲儒也高帝果不好儒耶何爲過魯以太牢祀孔子
乎是禮前此未有帝無因襲而首爲是舉可見高帝非真
不好儒所不好者鄴生僞儒耳世人不諒其心遂以不好
儒短之噫高帝之受誣多矣其亦不幸也哉予因侯之請
旣述建廟歲月而復言此以爲高帝辨于侯名讓滑縣人
守已愛民循良吏也其他善政不暇悉書云

漢高祖廟記

明稽世臣

豐高帝故鄉也舊城有雙棗老榦虬屈不華不實相傳爲帝兒時手植者豐人因廟祀其側比遭河患城廟并壞潛江李侯之蒞豐也值漂決之後凋落荒敝百緒更始乃從容經畫勤公卹私改城高阜民永有依矣爰履視封內歷中陽西澤之故墟詢事考古作而嘆曰嗟平昔帝起布衣舉群策誅秦燧項五載而成帝業垂統四百餘年鍾閭巽而開景昌斯固其地也廟祀不虔久矣雖微故事且將創之矧有諸廢而弗舉吾過也遂卽小華山之顛卜良程費以屬義民劉翥翥復益以私藏不日成之巍然立宮濯濯翼翼視昔殆有加焉李侯以碑來請夫禮緣分而定者經

豐縣志

卷十一 藝文類

十九

記

也因地而思者情也帝王廟祀國有典秩而舜於歷禹於塗湯於亳文於岐各有廟祀豈不以本始之地仰止尤切俎豆致情有弗可缺者歟且帝既定四方都關中復置新豐以悅太上皇帝其過豐也與諸父老子弟縱飲酣歌且曰遊子悲故鄉吾萬歲後魂魄常思樂此慷慨泣數行下又豐吾所生乃復豐比沛是帝於豐誠不薄矣英爽如在寧無戀戀在此乎今茲豐人固皆昔之父老子弟之裔也宅井甸以闡風卽桑梓而吊古能無徃哲之恩乎此固豐人之情也禮因人情而爲之節文者也以禮先民政之良也予每過沛上登歌風之臺徘徊四望有餘慕焉今因李侯之請而得附名麗牲之石亦素願也乃爲辭三章俾豐

人歌以祀帝辭曰騁望兮煙渚光靄靄兮上下忽颯颯兮
若來復恟恟兮莫覩乘黃幄兮御雲腰第鬱兮龍文帳故
墟兮漸返增繁思兮紛紛以上隆準兮虬髯燦龍服兮旒
冠瞻容與兮瑤席色含笑兮欲言樂康兮未極愴若聆兮
太息太息兮奈何戀舊游兮情多蘭馨兮桂芳紛雅奏兮
浩倡靈連蜷兮欲留促頽景兮心傷以上神馭兮上馳駕
火龍兮駿螭隨猛士兮遣征道前路兮赤旗送君兮靈浦
盼不見兮心愁苦願神陟兮明明保我民兮終古以上

重修漢高帝廟記

本朝王初集

漢高帝去今已二千餘載而其廟獨存於豐邑者豈非以
豐爲其故土哉夫人情莫不喜新忘故而至鄉井閭巷則

豐縣志

卷

藝文類

三 記

又念舊不忍忘故莊舄之作越吟張翰之思蓴鱸古今人
情大抵皆同也說者謂帝王奮興以六合爲家宜少異焉
者粵稽當年高帝崛起豐沛誅無道秦削平海內其聲靈
之四訖可不謂盛焉及大業已定過豐邑置酒宴諸父老
曰遊子悲故鄉又曰吾萬歲後魂魄常思樂此因慷慨泣
數行下彼其志豈嘗湏臾忘豐邑哉聞明嘉靖五年河決
邑改公私廬舍漂歿殆盡惟高帝與蕭相國小木像蕩漾
于洪波巨濤中依戀廟左右不去然後知滄桑遞變陵谷
屢遷而帝之靈爽尚流連於故鄉也廟舊在郊外因河患
遷徙不一康熙十九年縣令孫毓璘遷廟於城東北隅歲
月既久風雨飄搖迨今戊子春余躬行祭祀見棟折榱崩

而帝像且將壓焉爰損俸鳩工剔其梁棟之朽蠹易以良材去其墻壁之頽敗易以磚石幽沉者高爽之疎漏者嚴密之葺舊於將墜更新以圖成而居中帝像飾以黃金旁列四輔十八侯粧繪如故復繚以周垣以爲屏蔽經始於四十七年太簇月之望日落成於姑洗月之望九日黝堊丹漆煥然可觀雖規模制度不敢方原廟萬一亦聊以志帝靈之不忍輕去其鄉云爾

豐縣儒學記

正德辛巳知縣裴爵修

明蔡岳佐邑人

豐縣儒學在縣治東踰百步建自國初賢令丞相繼葺理然規制陜陋弗稱顧未有能拓而新之者成化間南海鄜侯撤明倫堂而重建之徐圖以改厥舊尋以遷秩去弗果

豐縣志

卷十三

藝文類

三

記

弘治間大名于侯欲改文廟於明倫堂南學門甬路於廟學之西市大材若干經營伊始尋以事去亦弗果正德以來弋陽陳侯欲大有興作亦遷秩去歲壬申六月大霖雨三日夜弗止平地水深數尺學門堂齋號舍俱圯于水惟文廟僅存歲時無以展拜禮朝夕無以容几席四明張侯欲圖重建顧歲誦於財與力尋亦改任去竟弗遂丁丑夏古澤裴侯以科目之傑奉命令茲邑視篆初卽慨然自任以興修之責顧民始脫泮洞未可興役乃寬租平徭去苛敷惠民力稍甦復值歲大熟乃簡丁壯取土增高學基首建明倫堂徐圖次第修舉堂甫落成代巡衡陽寧公適至進謁于廟退登于堂顧謂侯曰吾夫子道在萬世爲萬世

開太平廟以妥靈學以育才修建崇重吾司風紀暨爾職
有司者之責任也今豐學爲水圯構堂而新之固所宜急
殿廡齋舍門墻之未備責安所辭乎侯曰比方圖營造顧
工鉅費不貲豐俗尚義以公命宜樂輸無懟公如侯言以
禮敦勸得白金若干兩復各捐俸金益所不足貽之公帑
專命侯與幕宰高董其事侯復命醫官甯寵等分理之鳩
工掄材經始於正德辛巳歲首三月兩齋成五月大成殿
兩廡成七月櫺星門戟門會饌堂號舍成八月聖像滿座
從祀神主祭器成規模制度與先學圖若脗合焉者工旣
訖邑博平海林君濟南孫君命諸生買石以紀成績命佐
記其事竊惟學校之興廢人材之盛衰關焉人材之盛衰

豐縣志

卷十二

藝文類

三

記

斯文之否泰係焉豐學自乙酉初敝戊申寢敝其間欲修
葺者非一人而竟弗克就緒壬申大敝適當敝極之時而
裴侯能息民於流離傷殘之餘勵精秉公以肇興修之端
又得甯公以相厥成固天啓其會而匪裴侯之急先務甯
公之重斯文安能落成如是乎吾豐人亦當自是勃興焉
矣雖然天啓斯文以興吾儕游歌新學盍思新其德業以
共求副我裴侯與我甯公崇重作新之意乎必朝乾夕惕
忠信修誠以聖賢事業爲己任作楫濟川爲霖澤物以期
光我聖明崇文之治則甯公與我侯振起作興之功不但
若今所紀而已余言不足以軒輊姑記其顛末俾後來者
有所考云

豐縣儒學記

嘉靖癸卯知縣
李崇信重建

明張邦奇

豐縣有學在故城嘉靖丙戌河決城壞學亦淪沒縣令高祿携士民往遷境內之華山巡撫都御史樂清高公臨視歎曰豐人得此山依焉誠福地也可遂爲縣治乃奏請命下計日起工公遷工部尙書以去事遂寢已而黃河南徙逋携來歸徂舊懷土欲修復故城更縣令四三莫敢定計嘉靖辛丑冬潛江李崇信來令於豐廼屬其士民相土於故城三日又往從治河都御史淺齋郭公觀河於分流之源上下五百里歸而三復告諭豐人感悟咸以華山永無河患爲便遂定議曰當道諸公事行而提學御史裁菴楊君按徐復允諸生之請令建學校李令乃卜地於縣治之

豐縣志

卷十二

藝文類

二十三

記

東六十步北負山麓南臨水滸東連遠岫西帶長河爰卽其中營文廟左右廡各八楹前爲戟門東西爲神庫神厨前兩隅爲各宦鄉賢祠又前爲櫺星門廟東爲啓聖祠祠前二十餘步爲敬一亭亭東隅爲宰牲所廟西爲明倫堂仁義道德二齋前爲道義之門又前爲儒學門明倫堂西爲教官宅舍二區又於城中官地及市民地治諸生書舍若干區蓋數十年露享野祭之陋草榻旅食之艱至是始煥然新矣而李令圖慮之遠裁決之果矢顙之誠經畫之敏上下翕然譽之以嘉靖癸卯冬十二月起工明年甲辰夏五月落成費出於官帑之羨力借於公役之餘事集而民弗知云夫唐虞之時稷降播種契敷五教而其後皆有

天下延祚甚遠天之報稷契之功者爲尤盛也然則天下事孰大於教司教若授教者尚亦深思而永勵焉哉矧茲豐邑多故學宮肇新荅河嶽之靈副良有司之望亦在諸自新厥德而已李令楚產予門下士而能振興治教若此雖予未及之豐如聞絃誦聲也莞爾而爲之記

重修廟學記

嘉靖己未知縣胡又心改建

明胡又心

豐邑之學旣圯於水頃緣財力匱詘葺不以時士失顯所學殖莫寄歲己未冬節判張君邦治來署豐篆因諸生議得請于督學使者及監司郡長工未旣庚申春又心承乏是邑始謁先師見其遺址蓊蕪而神靈莫安也謂是風教首善地役其可追耶遂因前議相地於縣治之東卜築定

豐縣志

卷十二

藝文類

二

記

基鳩工飾材修治整飾自廟廡堂齋以暨儲庫訟事又心因偕若師弟子以申其意曰維爾邑實漢祖鄩侯之故鄉也史稱高帝不事詩書又每以絳侯輩少文爲恨然行多暗合意出獨見而安劉之業偉然一時者不可誣宜爾士之生其地者朴茂有餘而詩書藝文之事已蘊諸中矣吾不患諸生之無文也且我聖祖拯溺維新之後暨今皇上壽考作人仁漸義摩禮樂四訖薄海要荒罔不爛學况豐爲古帝王名世之鄉又在中原文獻之域者乎吾誠不患諸士之無文也惟致道之本必有所在姑以茲學廢興之迹言之且學之始建先師有廟明倫有堂居業退息觀頤觀德亦各有所耳目之所聞見動履之所率由皆規矩準

繩地也諸士身與心安所以精其業進其德者不有大賴于是乎迺者一爲洪水所蓄卽蕩薄顛覆安聖靈而宅俊又者湮折罔遺載閱數時始獲更新爾諸士將居斯遊斯絃且誦于斯獨不知人心之洪水易流易溺濫觴於情欲之竇而汨沒于辭章之波甚則湍激潰決不可復挽而爲聖賢之靈臺爲天君之丹府爲人倫五官之營絡爲格致誠正之安宅爲修齊治平之正路亦有湮沒蕪蔓之幾盡蕩爲茅塞之區若是乎可經時而不復也其孜孜從事所以遏其源塞其流爲堤爲防以捍其衝亟反旣放而杜漸將來俾於是而奠厥居者又必何如以致其力而後可也夫事有殊而理則一者君子可以推類矧學宮爲諸士日

豐縣志

卷十二

藝文類

三

記

遊息地而廢興之迹又若所目擊者因彼以識此緣身以求心則學圯于奔放之水而復之者有司之責學荒於流溺之弊而新之者伊誰之責歟諸士盍於是而反思之也子夏曰百工居肆以成其事君子學以致其道而後爲善學夫惟道之旣致而後學爲不虛否則且百工之不若回視昔之受圯於水等耳詩曰其何能淑載胥及溺子諸士能不惕然于茲乎夫觀廢興之迹以爲身心助反之致道之本而復以淪胥爲懼愚日以磨濯勵精爲諸士勗而移風易俗之會不有望於一新之後乎其諸廟屋次第具列碑陰

修文廟記

隆慶戊辰知縣尹梓修

明尹梓

豐爲古徐之屬邑先是嘗有廟以祀先師有學以聯師儒矣嘉靖乙酉黃河泛溢衝決邑城公私廬舍蕩折一空縣治學宮盡圯于水乃徙縣治於華山之陽學宮隨之越二十餘年辛丑水退遺址猶存士庶共思復之前知縣徐黃因舊溝爲限復城焉建學於縣治之西北隅陰陽家謂其文星幽隱科第終艱也議更之不果暨知縣錢塘胡又心亦以文風不振爲多士憂遂擇地於縣治之東稱吉壤焉地近東門約半里許週圍廣濶約十餘畝其外爲櫺星門兩旁爲儒學東西門少內爲泮池左右祀名宦鄉賢後爲宰牲堂中爲戟門內爲先師殿兩翼爲兩廡左爲祭品庫右爲祭器庫少後爲明倫堂左右齋曰修德曰明道東西

豐縣志

卷十二

藝文類

三

記

建二角門門之外東爲啓聖祠西爲敬一亭又後爲教諭訓導宅規模宏敞氣象巍蕤煥然一時文明之觀也余於聖天子龍飛之二載歲戊辰受命蒞是邑適黃水甫退之後瘡痍未殄官民廬舍傾頽過半三日謁廟見宮牆鞠爲茂草不覺仰天歎曰是豈有司追崇先師之興化民成土之意耶踰三月秋稼告登民力少息遂鳩工戒事修築彼舉官師宅垣無慮百丈樹築完固厥工告成又踰年己巳春仲予喜飭厥材鼎厥新以觀厥成焉乃於公餘遂度其所費材物若干工役若干計時若干丹碧黝靡一不備財不誦而用已裕民不勞而績已底經始于二月中旬訖工于七月既望非吾民樂輸之誠令亦焉能坐享其功如

是之速哉遂伐石爲之記非敢後一時之盛亦欲以告後之善繼者云爾董斯役者義官邵綬老人王貞也

重修廟學記

萬曆壬辰知縣費思箴重修

明

張貞觀

沛縣人

豐縣學自復舊治來凡三修矣常山徐君莫倡其始錢塘胡君以心主其遷南宮尹君梓葺其成規模粗脩宏敞蕲焉今皇帝之十五年楚荆門費君來知是邑下車未幾謁廟視學迴環瞻眺嗟浴慨噫爰進師儒訊之曰豐不稱漢高皇帝故鄉哉一時從龍之佐樹績垂芳千年若覩乃今文治湮鬱科第寥絕是何前豐後嗇毋亦毓秀妥靈之地規恢未稱耶是余有司者職也余豈憚爲爾多士一潤飾之於是建泮水一區於櫺星門外濶狹如制撤門屏卽其

豐縣志

卷十二

藝文類

二十七

記

地樹綽褱三架通賢路也明倫舊僅三楹則增爲五楹櫺星歲久朽敝則力輦木石新之名宦鄉賢二祠初循兩廡之例各東西向則擇隙地南向屋之謂崇德報功于斯稱也統築磚垣縱橫各如千丈園之外作浮屠數級奠之巽方卽言出堪輿弗廢也漢高皇帝祠舊建城外別構樓五楹學宮之後移祠之備形勝也今年春衆役始畢司訓尹君洎闔庠弟子員以費君政知所先謁言不佞與鐫堅珉用托不朽不佞沛人沛豐所豔稱今昔者則漢高皇帝哉學士家一懷鉛槧輒鄙乃翁以馬上治不事詩書雜霸王道徒貌言耳漢承秦後坑焚禍慘矣高皇帝起布衣五載而成帝業瘡痍甫息干戈甫定一過曲阜輒能以太牢祀

孔子彼所稱天授之識靡所藉賴者卽其絃歌全魯新語
納賈又高出近代帝王之上以故培植一代人物文章節
義炳煥昭揭史不勝書說者謂過魯一祀重於九鼎太呂
信夫今去高皇帝千百餘年風流餘韻猶可挹者矧豐又
其枌榆故里厥振勵當什蓰寰區矣嗣自今務藻其心志
粹白其行甯澹白毋紛華甯伉直毋滄嫻甯茹納毋褊狹
歛其彩如文豹沛其施如神龍節義文章肩摩武接卽兩
京之彥能獨擅美耶火鬱思發其焰必熾水壅思決其派
必長不佞且拭目俟之矣費君名思箴今陞楊州府同知

重修儒學廟記

順治丁酉訓導
江能容觀修

張能麟

豐縣志

卷十二

藝文類

五

記

祀典遂定後世帝王知所宗尚高祖真天授也哉然高祖
豐產也地近鄒魯始習聞聖人之遺風故雖不事詩書獨
知敬慕夫子如是耶鄒魯之人天性樂善豐壤相接其風
俗亦有與世殊者顧自漢至今將千七百年詩書禮樂淵
源紹述當爲河朔文獻之區乃自晉季以來中原用兵河
北先受而豐子弟多擊劒任俠卽學宮遽興金元之末或
兵或火至明中季又没于水豈地氣變遷至斯文湮晦如
斯耶今學改建在嘉靖時逮明末寇訂齊魯孽火彌天庠
門生棘

清鼎革初宮墻俎豆之事未遑舉也余受

命校士遍檄所轄郡邑崇飭學宮瞻茲豐邑接壤究齊留

梁木于妖鋒之下存神几于飛矢之餘塗塗丹雘于今更
亟今司訓江能容舉毅任事不辭勞勩學諭顧言繼至共
贊厥成一時諸士量力効輸趨義恐後至里巷布衣有渠
燥者輸金二百建層樓以合形家之勝匹夫有善不沒其
名更足多也其間或創或修自廟廡祠舍齋垣泮壁以至
聚奎之閣習禮之堂靡不闋耀改觀在豐多士瞻仰之下
泮水重清風雲足奮矧新豐雞犬尚勞夢寐故魯弦歌能
不興懷謂地氣移人天性之不皆好學也豈其然哉即邑
學頽廢已久有志之士一旦奮起能勉克任凡在衣冠輸
財各効而市井無聞之徒非有勢劫分脅也一朝慕義損
中人產而不惜可見秉之之恒盡人而具益以見天性之
豐縣志

卷十二

藝文類

三

記

皆善而好學之良未之或亡也且觀學之久廢而忽興愈
以知天下無不可爲之事而功名道德皆在士之志有以
自取之志至而氣應焉人傑而地靈焉文學蔚興人才蒸
動衰歇之久一復鄒魯絃歌之舊是則余之所亟望于豐
士者哉

重修文廟記

康熙己未知縣孫毓麟修

魏麟徵

聖人之道如天地之大自邦國以至郡邑莫不立廟崇祀
甚鉅典也嘗讀史見漢高帝過魯以太牢祀孔子輒喟然
曰文教之盛其始此乎豐去魯不三百里爲漢祖所生地
其沐浴聖化最近而其崇祀聖人也爲最虔攷之邑乘建
置文廟從作新邑於茲有年矣洎戊申地震廟宇半圯逾

年次第漸修而上無實心者爲之倡下即無協力者以贊
乃事惟我三韓孫公令德名賢由典儀出宰豐邑慨然以
興起斯文爲己任曰安有日讀聖人書而使廟貌弗整至
此乎于是規度地勢鳩工庀材用形家言峻峙櫺星環繞
類壁如二曜之相合五行之相生門之內巍然者爲聖殿
翼然者爲兩廡遞及各宦鄉賢諸祠凡棟梁榱桷几筵門
戶罔不塗以丹朱絢以金碧煥乎文采之輝映也門以南
建奎光閣於城隅以挹其勝於前學以北建漢高祖廟以
壯其基于後東南鳳鳴一塔遠覽華山有翱翔千仞之概
攬西北浮屠數級以配吳木文明之氣奎聯壁合霞起雲
蒸大觀備矣易曰賁之義大矣哉夫賁者飾也靜觀乎人

豐縣志

卷十二

藝文類

三

記

文以化成天下况文廟之興廢實係文運之盛衰今孫公
振興風教廣厲學宮尊賢育士凡爲治于豐者一皆以聖
人爲師故士民愛戴趨事恐後人爭子來不半載而工成
信乎孔子之言君子學道則愛人小人學道則易使也余
適入都過豐明經劉子文學朱子輩時分董厥事屬余作
文以記余乃進豐人士而告之曰漢文教之盛當萃于豐
後之人宜思所由來爭自濯磨以應當世非僅僅爲善於
鄉已也其始自今益相與湔其習正其志行以孝弟爲鑑
基以詩書爲堂奧以禮義爲戶庭以道德爲墜茨以功業
爲樸斲以文章爲丹雘鼓其氣乘其運作其合應其求以
無負聖人立教與

朝廷崇儒重道之盛典庶彬彬乎鄒魯文學之風可復睹于今日此則公之所厚期于士而士亦以此仰答于公者也是以記公諱毓璘號文伯遼陽襄平人

重建學宮碑記

乾隆甲戌知縣盧世昌修

史以張

邑人

嘗聞古之學者處爲真儒出爲名世自漢迄宋代有聞人固其克自振拔者迥異尋常抑亦庠序學校之設有以培其本而達其枝故也豐爲高祖龍興之地風俗朴茂猶有漢人遺意而有宋以後耳濡目染其士風漸以文明擅古之長據今之秀則上之施化莫易于斯顧所以導之者何如爾豐學之頽廢久矣山西楊公泌來涖茲邑始有募金之舉四川宿公生澍繼之咸以移秩去不果至我侯盧公

豐縣志

卷十二

藝文類

三

記

世昌涖仕百度維新尤重此舉毅然身任鳩工有日矣旣而淫雨連月歲將告饑又傳聞大差紛紜叢集人皆慮此事之不可爲也乃公志愈堅氣愈銳以爲尊師無異君親教化不後衣食捐資不敷現有養廉千金可以經始由是豐人感激各自懋勉而史君鵬翼孫君朝櫛顧君奎寧君煥等尤公而忘私不避艱險數月之內各工俱集較之從前巍煥有加焉總計落成之日不過百餘匪公毅然身任何其周且速有如是耶嗚呼豐學之頽廢久矣賢父母爲之一倡而四方之士響應而圖之如恐不及由是觀之世多謂人不樂學豈信然哉今者幸值文教修明之日士人器識自爾高明况黌宮告竣一切造士教導鼓舞之典無

不明備如此者乎使宰是邑者慕武城之絃歌鐸是邑者
沛湖蘇之條教雖古之去今遠矣而無小無大于邁從公
道德步乎濂洛關閩文學宗乎韓柳歐曾文運昌而人材
出唐虞三代之盛可于是日肇其端矣余隨執事諸君子
後而樂其事之有成也于是乎勒石而爲之記

周苛碑記

唐李觀

昔天喪水德未有受命者而劉項之戰方苦殘毒軋于生
民御史大夫周苛世籍于沛豐始漢祖起而隨焉時漢以
新阨睢水之圍遽保滎陽楚人四面攻之內無完備憂難
持久用將軍紀信計而漢祖免用周苛守後事以禦外敵
敵知其危併力蕩搖哀哀遺軍創痛如積雖授之以利兵

豐縣志

卷十二

藝文類

三

記

束之以堅甲而莫能起非愛死也力不堪也故城覆於項
氏項氏毅然鷹驟變大鼎於宇下謂苛曰請封三萬戶爲
上將軍軍之政自不穀而下及卒乘皆聽其所爲不從則
烹決無疑焉公怒甚色作視羽而咳之曰吾聞不善者善
人之資今天將錫漢是用汝資之不卽倒戈請命汝死無
日矣且秦政反道殲滅六國天人合怒睢類不留今汝之
業不足侔秦而罪侈于秦曾不知天以陰隲興喪與奪而
猶與漢爭鋒且若戰數勝攻數尅非君能也天厚其惡惡
厚將崩何得長哉項氏恚公之不屈而恥其詭已聲如乳
虎指左右捽公於沸鼎公奮身不顧蹈鼎而卒嗚呼糜軀
冀於不朽不朽在乎立節立節在乎顯王王顯節立獨苛

有之與夫由余受戈宏演內肝殊也初苛殺魏豹可謂無人薄我及拒項氏豈非臨難不苟免耶觀感公之雄果而史無傳記敢鑿幽石以承闕文其辭曰龍戰未分崩雷洩雲雷奔雲洩其下流血滌陽攻急介士涕泣赤帝徘徊惟公在哉秉心慷慨處死不改沈沈積冤千古奚言紀公光烈系史之闕

城隍廟記

元表 煥 邑人

至正十年冬山東道僉肅政廉訪司事林公奉議按臨到縣會洪水方割殺越人於貨者萃乎淵藪無辜籲天不堪荼毒公乃拊心軫念日昃不遑雖欲盛陳兵威以戰取勝柰生民何本縣城隍素以威靈著至大年間簿尉王榮祖

豐縣志

卷十一

藝文類

三

記

亦嘗禱焉應如影響公知之遂倡濟甯路同知總管府事寶公朝列親詣祠下祝史陳詞至於再三遂樹榜立期初以順逆之理論焉更以帶牛佩犢之義諭焉未浹旬悔返自新投兵首伏者幾四十名而渠魁殲焉餘皆欽依元降詔招誘徭寇一體免放原業聽爲良民縣尹劉士王薄黃彬及諸寮案歛衽而言曰今郡寇雖附意猶怏怏萬一反覆計將安出大人德尊望重人心慙服儻以借恂見許斯民幸也公曰前所按臨郡惟恐少留汝能如是亦吾所願也遂止閱月屢出溫言撫慰不已寇始安乃進縣尹及寮案喻之曰此方被害已數年矣朝庭屢其憂生民罹其害撫馭撥甲者動有千數執馘獻俘者曾無一二今不動聲

色而歛手來歸是皆神明威靈之力將何以報德耶方欲
廣其基址壯其廟貌聳其觀瞻爲惡者知所寒心倥偬間
慮不暇及有公錢十緡以助其費惟汝賢尚承我志克遂
厥功不亦可乎僉曰諾縣尹輒與達魯花赤慶壽王薄黃
彬縣尉馬公諒典史王輔及耆年士夫謀曰神明之靈不
可誣憲司之言不可緩也時方春可課其章程肇其張本
舊址墊隘其將不久莫若東徙越二十步形勢漸高宜可
爲神明舍衆是其言募衆傭工猶初創建正殿四楹神門
三楹階隅廉直簷阿翼飛望之翼然越一寒暑而功畢達
魯花赤也速答兒王簿謝永錫及縣尉德懋典史郭榮祖
尋皆到任縣尹又謀曰功既畢矣苟不述其始末勒之堅

豐縣志

卷十二

藝文類

三

記

祇後日孰知神明有靈憲司有感耶徵文於予予竊謂城
隍之名雖不經見然少有功於民者尙猶祀之况城隍所
以保衛良善防禁奸慝耶爲是舉者不惟有以見神明之
有靈尤有以見聖朝銓衡有法風憲得人也義不容辭秉
筆以記

城隍廟記

明 胡又心

夫明有禮樂幽有鬼神其致一也聖天子以明德駿功統
馭四海爲天地生靈鬼神主旣疆郡邑設守令以禮樂教
其民復懷柔百神隨守土定分封俾司城隍陰相保障迺
奠居於祠宇薦潔於牲醴導誠祝冊索之幽以贊之明罔
非爲生民計也維是豐邑城隍神其驗素著廟在今城東

隅嘉靖丙戌圮于水越明年徙之華山歲在壬子始復今址草創祠宇規制未周暨火心來守此土入廟服虔慨明赫之莫稱遂分俸倡工而學博王君承乾縣尉黃子家各捐俸繼之隨有鄉民黃一攬輩捐貲出力以相厥成廼建後寢五楹左右廊各七楹二門三楹并緝其舊建正廟大門各三楹於舊司土祠西復創先農司穡祠三楹廊作三晉對案諸獄變像以警誘愚俗顧財非賦調役不追呼經始落成凡期月而輸餉聿新雅稱瞻仰所神之靈其使之哉役既就緒敬述始末以紀歲時愚惟昔者封建萬國以及神靈之封凡七千有奇三代迭興雖禮樂不沿而事神治民罔或有二矧是城隍之神共我聖天子明命保障一豐縣志

卷十二 藝文類

三五 記

方疆域生民實神是賴非壯麗完潔罔以竭虔受靈也然凡有守土之寄者於僚屬未御先必剖羊豕具酒醴齋香帛汎掃齋戒以矢神曰某爲是也事不協於神者不祥載在令典舉如故事及退質所行果一一如所矢乎否耶嗟夫神如正直毫髮不可欺誓於幽爽於明欲神罔怨恫難矣父心凡劣昏瞶奉職無狀惟神默佑其衷以求相安守此方之民而未能也後之蒞茲土者其毋貽我神羞則幸矣爰泐石自警因爲將來者告云

東嶽行祠記

明 任惟賢

天下多名山惟嶽爲衆山之宗岱又諸嶽之宗東嶽泰山祀之宜矣而古人祀祭禮各不同者地祇也祭之以壇壝

而不廟自魏拓拔氏始立一廟於桑乾水之陰逮唐迺諸
嶽各立廟于其地東嶽泰山祀之遍天下則肇於宋之中
葉而民間有祠則又起於元之季世蓋天君也地后也嶽
鎮海瀆皆君后之臣也古者祭東嶽之禮視三公弗爵弗
像特以其禮禮之而已唐開元像而爵之以王宋大中祥
符隆而尊之曰帝廟而爵爵而像地祇而有若人焉於禮
何據乎豐縣治西北去一舍餘里曰司馬阜曰娥墓延袤
殆十餘畝元至正間里人建東嶽行祠於其上迄宏治乙
丑歷今百餘載崇奉者無替水旱蝗疫有禱輒應先是歲
丁巳以來黃河水溢縣之南九里悉爲巨浸里人恐患貽
乃相率而扣於神水因弗至若默有禦捍之者齊民德之

豐縣志

卷十二

藝文類

三六

記

顧祠宇震凌垣墉頽圯居民欲新是謀而工鉅未就甲子
秋歲大有鄉耆裴林等謀於道士郭東山遂爲鼎新之計
於是遠近聞之富者輸財勇者輸力巧者輸技相與伐木
于林採石於山陶瓦於竈建祠廟三間後廟三間像貌莊
嚴節稅藻繪丹青炫燿金碧輝煌祠之前爲門屋一所祠
之後植樹百五十株經始於宏治乙丑春二月訖工於是
年夏四月廟以落成請記于余余因撫古今祠祭循習之
由以俟議禮者之討論衆以爲是舉也於禮凡能爲民禦
災捍患有功德于民者得通祀之禮以地祇而不入其像
尊比三公而不帝其稱兆之於四望而不屋其祠特祭於
方岳而不徧祀於鄉邑以免夫子之議林放之歎則在乎

興秩宗者至之而此下情真切非敢爲僭也復作詩一章俾歌以祀神曰赫赫岱宗颶風英風建廟於豐保障帡幪有禱必從無感不通歲月浸隆民以時雍仰載神功祠廟攸崇維罔怨恫護佑無窮

關王廟記

明 任惟賢

豐邑古徐州域漢高帝誕生之鄉也城東北隅世傳爲帝故址鄉人卽其地建廟祀帝配以何勃謂一時君相並起於鄉誅秦滅項于今爲烈將以俟其盛焉固也高廟之左別有一廟祀關王則爲高帝之迹熄於魏吳王能佐昭烈安徐州炎祚以續豐實經理之處精誠應感固當質之在旁也余釐祀典及此嘗美豐人得祭之義而非諸方惑於

豐縣志

卷十一

藝文類

三

記

禍福報應者可例論矣乃今之正月望日闔學生員率父老數十人集庭下請學之西偏隙地再爲關王營廟且言工料俱已備矣更不敢以一竹木一瓦礫煩他姓也余初擬其瀆祀弗許諸生請益力僉曰是舊蹟也圯於水鄉之士民過其前每以修復後時爲憾明公若終廢之于人情將無病乎余味其言而信豐人崇重關王之意類於孝子饗親不一其處者矣余因爲之說曰廟在高帝之左重王之無愧於漢先祖也廟在學宮之右又重王無愧于我先師也蓋學所以明人倫而君臣則倫之大者王處羣雄竊據之世而能不廢大倫不避艱險收炎劉餘燼噓之使燃先師成仁取義之訓王其見諸行事也哉斯廟也雖前此

未之有亦可以義起矣爰出俸金十二兩願拓其舊制維時豐人咸喜不踰月而廟成余與南峯李君安泉楊君蒙泉誌君往豐之畢則諸生諸首義者拜稽首焉作而曰子夏以事君能致其身爲善學由關王見之矣楊子雲以夷惠之善微仲尼奚其聞由明公見之矣胥錄始末壽之石以勸來者

重修河伯殿碑文

國朝 劉 湘 邑人

河伯祠舊居縣西南隅規模頗狹自明萬歷中葉移祠於泡河北岸亦屬草創洎萬歷四十七年邑侯王公河廳潘公重修之而廟貌式廓彼時尚未有大殿也迨天啟七年邑侯劉公河廳林公領袖薦紳士民庀材鳩工前構大殿巍然聳新

豐縣志

卷十二

藝文類

三

記

國朝定鼎之初有司蒞茲土者庶事旁午日不暇給營繕之事缺如也加以戊申地震之變棟摧瓦裂不蔽風雨邑侯何公春秋舉祀惄然有憂之謀于同寅捐俸修葺益巍且煥焉少尹徐公廣文王公皆與有功而始終董其成者則縣尉徐公邑貢生劉子運魁也或曰邑之當修者多矣如學如城如塔如高廟皆謝未遑而顧河伯是急乎余曰此正救時之急務也賢令尉之苦心于茲見矣我豐惟正之供較鄰邑爲輕而數年以來民不堪命無非此一綫黃流糜費殆盡耳往者決曹單近者決桃源一歲之間動徵柳數萬徵夫數千彈丸之邑何以堪此雖氣運使然哉或

涖茲土者事神爲民猶有未盡其誠者乎賢令尉之爲此舉也其事神也民見其心矣其爲民也神鑒其心矣故曰救時之急務也或曰泡河久不行水邑之利害不關此地河伯之靈在茲乎余曰不然神無所不在猶水無所不周也掘地得泉而曰水專在是豈理也哉此殿旣成將國家億萬年清晏之福胥於河伯乎祈之寧特爲一方祝安瀾耶是不可以無記

築護城堤記

明 胡又心

豐縣地故平衍水接上游先是洪水爲災潰自西北曹單之衝漫決入城民盡魚鱉邑里變遷歲壬子始循故道縣復舊治然泛溢不時民心皇皇僉曰隄防捍禦實在事先

豐縣志

卷十二

藝文類

三十九

記

時邑令戴君輔以鄉民王佺等詞陳便宜得請于監司郡守度地築基集人具版未幾君擢守巨津又心實代之用稽成度條督就緒經始於嘉靖己未秋八月至庚申夏四月竣事中間以凍輟工者凡三月工計二百日役及二千人堤本厚十步土以漸斂約四步高及一尋環視之形視城延袤之步視城稍廣週植楊柳爲株計二萬有奇顧夫則均于地間土卽塹于堤畔土起成隍亦停貯殺濟之一助也至歲壬戌秋水大發較徂歲有加次年春復有鄉民劉崑等議于堤顛增築二尺許夫減昔之半得五十日而成工始大備民用無恐竊惟若防止水先正明言而失時不修明條有禁有守土之寄而以民事爲急者諒不泄泄

於此矣廼若卽舊圖新因時通變爲豐萬世永賴計當出于增卑培薄之外者則有望于將來云

創修磚城記

明 陳文燧

按豐故宋地去彭城西百五十里華山控其前泡水環其後魚臺單父相參錯曠野平原寥邈無際固勝地哉而赤帝子四百年王氣實發祥于茲也予自萬歷丁亥奉璽書備淮徐兵以省方入其境顧瞻芒碭東華巒巖翠崒瀾瀾乎有大風之思焉方其起豐沛入函關定三秦鞭笞天下詎不稱雄傑廼歸休湯沐聲歌慷慨又思得猛士守四方詎不謂投石超距所向無前虎豹在山卽令藜藿不採乎然不知守以士士以猛猛有時屈力有時窮拔山蓋世亦

豐縣志

卷十二

藝文類

四

記

垓下虜耳然則重門擊柝設險守國奈之何其可廢也縣城自炎漢而後以迄我明屢迫河患嘉靖初崎嶇東徙已復故處重堤外維昏墊漸達而日就傾圯終非長策予揖長令費君語之曰邑無堅城脫歲惡不入刁斗一驚其將謂何費君曰公不忘我豐屏翰敢不征繕以聽事期乃率其丞史物土方度高廣而差其徒傭財糗謀於耆父老者父老欣然願計畝輸磚訖工而止費君曰吾不忍獨煩民也邑中舊有官田若干畝若等共市之用輯羣材而餽傭作上下僉同乃奏記總制與臺察俱如議費君身先率作計日課工四境之墮肩負輦載者踵相錯於城下首東南次西北四面分番甃壘各者長競督徒傭晨夜展力其樓

櫓亦撤舊爲新凡六越月而告竣辛卯再行部登城眺望
飛葢列雉固若金湯私念長民者將社稷是藩患弗爲耳
以今觀之百堵堅峙綢繆嶙峋卽前日之壤壁塗陵而風
雨所圯者也千雉森羅密匝繚繞卽前日頽垣疎塹而藜
棘所蒙者也中實外峭險足憑而勢不可仰卽前日烟霧
晦冥之候鼯狸所上下而攀狎者也今而後邸署之錯列
貢賦之蓄儲烝黎之託處四方之走集千萬襁負於斯捍
衛之益其有涯哉夫功成保障足稱不朽而令方恐疲其
民民且恐勞其令上下交相得以樹無前不費公帑不奪
農時寓內勤事之吏指不多屈矣予方捐幣鏗牒事事者
環城數千人擁遏不肯去余曰豈善後未備乎諸父老子

豐縣志

卷十二 藝文類

聖

記

弟曰公自丁亥按茲條革冗費幾三千金且進吾民詔之
勤儉寬忍爲生聚計長公如約馘字越三年豐幸稔且穰
野無吠驚吾儕願見顏色而又甃砌城郭奠安百世計十
年前城將圯卜諸神神示曰爲長計湏用費城城工必徐
公今公果成城而費長君實主其事豈天生二公爲吾儕
而神預知耶吾儕不能爲報願稽首以謝予謂神說荒唐
不可究詰信若曹所言卽豐所以城也惟費君承肩初志
以撫若曹若曹無弁髦予言長養其子孫豐且無城而險
士且不猛而守矣矧崇墉屹屹爲曠古所未見之緒哉父
老子弟稽首觴余余爲之觴費君書門額因紀顛末如此
云城廣一千九百八十四步高二十尺門四東曰聖華西

曰障瀾南曰中陽北曰大澤角樓四梁一千五百六十是役也灰木取諸宅畝之值者費金一千四百六十九兩有奇磚以萬計者六百五十有四夫工以千計者六百辛卯春三月始事至秋八月報竣邑簿林時藩邑尉趙坦督工官魏惟臣高籌等並有勞者亦如例書之費君名思箴起家鄉進士楚荆門人

大觀樓記

萬曆十九年知縣費思箴建今廢

明毛志尹

豐侯荆門費瞻南公蒞豐五載政善民安興舉廢墜慨邑無堅城而新之工告竣因城之餘材人之餘力建樓北城之上實邑治之後也予得第後從京師還過豐而樓適成視其額曰大觀吾知公所以命名之意矣夫觀非遊觀云

豐縣志

卷十一

藝文類

三

記

爾也大觀者非無遠弗矚縱目適情云爾也嘗讀易而得觀民之說焉樓因乎城而高倍之城以內閭舍鱗次市道錯陳往來走集馳務紛紜此樓可得而觀也城以外畦圃成行桑麻交植耕獲蓄畚出入作息此樓可得而觀也觀之而家殷人足野棲畝被謳吟之頌逮乎四境司牧者能不躍然喜觀之而里巷蕭條穀土荒蕪怨咨之聲載于道司牧者能不愴然悲我何爲而以民喜意者平日能樂民之樂故民皆獲其天歟又何爲而以民悲意者平日未能憂民之憂故民不聊其生歟夫我之悲喜感於民由登樓之觀所觸也民之憂樂繫乎我由觀民以反觀是亦樓所助也然則斯一觀也豈曰小補之哉樓之作誠深且遠矣

故以觀名而特謂之大若夫啟牖澗欄歌風醉月供賓歡而寄吏微瞻南公擬建之初意恐不如是也亦非吾所望於後來者云

東華山碑記

明 萬 恭

豐沛之間平原千里亡有峻坂崇崗徐州諸阜之北峙爲華山高三百尺有奇曳尾聯諸豐驥首接諸徐若黑子之着面上產蒙山茶下懸巖洞爲歸雲爲偃月爲來薰寶鍾沛公沛公都長安爲新豐而以所生豐爲舊豐長安有華山亦令豐有華山蓋以舊豐尊新豐又以長安之華山尊湯沐邑之華山重本始也嘉靖間河灌豐邑治盡圯則徙邑於華山環而居二十年民樂故土盡思北歸復棄華山

豐縣志

卷十二

藝文類

三

記

而邑諸故豐隆慶六年余以左司馬治水徐邳豐沛間懼河北決壞餉道爲常山蛇堤延袤二百餘里倚華山而縷旃河亡橫流民鮮漂沒余乃循堤登華山之巔以東望齊滕南仰鳳泗西盼宋衛北瞻岱宗諸阜若揖者若拱者若顧者若留者颯颯乎有大風之思焉壯哉山河猶故也乃泗上亭長安在哉威加海內歸故鄉者又安在哉華山求復爲湯沐邑巨鎮令父老感且愛且戀且重焉不可復得矣豈惟不感且愛且戀且重之卽求不爲民所燒石伐巖堙洞摧其顛而戕其麓亦不可復得矣豈不悲哉余特爲封華山令有司曰所有燒石伐巖堙洞摧顛而戕麓者罰無赦而華山始得保一朝之命嗚呼山靈不失故吾猶在

昔能翼蔽沛公貴與長安華山並乃今僅僅爲邑城不能保又失之賤與丘垤並山靈其若之何猶幸余以河患倚山而縷之堤耆老不愛山而奈何不愛堤而自固乎山靈有知其尙自愛擁堤以自衛而衛民則父老愛之當萬倍於長安之擁虛名徒爲沛公之所尊者

重修龍霧橋記

明失名

豐邑去東五里許有一石橋名曰龍霧橋北去三十步有廟曰龍霧然廟無額橋無碑世人相傳而已時孫侯蒞政于茲拳拳以修舉廢墜爲務而於橋梁神祠尤先焉景泰二年三月間茲土久旱麥苗將枯斯民皇皇而侯等徧禱百神未雨而侯竊念予遇神祠莫不修舉但於龍霧一廟

豐縣志

卷十二

藝文類

四

記

未克修焉於是率僚庶修之於橋旁地掘尺餘得一碑破裂不完詳觀乃知爲宋紹聖三年邑令杜因橋禱雨雨輒應載立廟之始末頗詳侯得是文卽日命工重修數日大雨方千里侯等踴躍大喜遂錄前文重命余爲文立石以記之余惟橋祠去古已遠沉埋湮鬱幾經隆替矣而其有靈氣者鍾於神物雖久而不衰况龍也霧也乃天地陰陽之全變化聚散皆不可測是以龍興霧滄理勢必然而取以爲斯橋之名斷自漢高初生母遇交龍而得後基四百年之帝業豈偶然哉至今豐人尙仰龍德既生漢高以顯斯土於前復賴橋祠以流惠澤於後萬古一日何其幸哉然非特豐人之慶實後人之幸也繼今以往貽我來辭帝

命辛育豈不有契於詩人之頌乎慕漢高之德以壽斯土之民豈不有光前人乎且橋祠一新規模勝概尚有如今日之繼杜令者焉是爲記

華山書院記

明葉燧

豐徧邑也邑之鎮曰華山崛起中野山之陽有隙地隣學宮諸士子以號舍無址欲爲肄業之所燧爲請于督學馮公兵憲王公市之於民復以廢倉益之楹爲書院院背山麓涇水湮蕪於是乎加疏濬焉中洞豁然而關洞前諸景可攬命曰會景後架小橋以達西洞洞塞巨石曳而虛之曰虛白前通鳥道折出石壇下危岩屏設石離離林立亭其中曰寄興亭之西石門半蝕上中刻而深之穹然一洞

豐縣志

卷十二

藝文類

四

記

也曰碧寒洞旁小亭曰獨對北沿仄徑南出斷石之間東至通幽洞景絕而路窮矣天剗一竅旁通並麓軒石壁千仞森削于前左有洞曰太玄右有池曰太乙登觀風亭可以騁遐矚而納遠景也亭之後爲高皇廟前爲瞻石齋而齋多奇石轟轟如畫石罅線通徑路東至賓陽亭西至閭月亭奇蹤殊狀錯出深菁叢莽之間宰物者亦容得終秘之哉由是觀之美哉山之體具於天也人力若無預焉然而浮土昏之叢棘蔽之淪落于荒僻之墟不能不假手修平宣靈發秘所以致廣大而極高明也諸士子固將持志于有恒養氣于無餒務使胸次廓清事功俊偉無以異于此山已乎抑蠹於章句俳于文辭游泳三科目之中茫無

豎立以異于此山已乎是在諸士自擇之

華山書院記

明王 樾

豐故徐屬邑往歲以河決徙治今華山治當山之麓迤邐稍東爲學宮隘弗稱葉令炷至以歲之乙巳白之督學牛山馮公暨予復並麓稍東爲華山書院門堂號舍咸秩矣堂之後復並麓稍東爲軒境幽而奇予行部偶寓進諸生而訊之曰令之爲茲其情深其志戚矣古之教者時教必以正業退息必有居學故君子藏焉修焉游焉息焉是以安其學而親其師樂其友而信其道雖離師輔而不反也夫學宮者時教正業之地也書院者其退息居學之所也並麓爲軒幽而奇者其藏修游息之墟乎諸生處焉有日

豐縣志

卷十二 藝文類

四六 記

矣果能安其學而親其師乎果能樂其友而信其道乎抑能離師輔而不反否也夫動靜不違而內外合一者作聖之極功也情以境遷而機由靜悟者爲學之始事也吾心之良本自惘然顧眩於紛華昧于功利日昏日瞶卒無以自解偶入靜境雜擾頓息如蹈湯赴火之後沃以清泠之泉其神躍然心目俱爽矣察此之謂察識推此之謂擴充知此之謂知及得此之謂仁守蘊此之謂天德措此之謂王道故親師友而不倦離師輔而不反也是之謂古人之學夫以古人之學望諸生望之至者故曰其情深夫太上無境其次境境最下不離境安土敦乎仁何境之有語有之吾聞夫子之道而悅出見紛華而悅是謂境境怒於室

而作色於其父何境之能離夫無境者吾不得而見之矣
必也其次乎孟子三見齊王而不言事程子之教每令學
者先靜坐彼有取爾也易之道羣陰盡剝而後復今之學
其益也久矣夫藉境生心而緣靜興悟是之謂始學之道
嗚呼其不得已而思有恒之意乎故曰其志戚夫聖學無
歧而人心有覺也天地之性無所擇而後生豪傑之士無
所待而後興太行之東大河之間蓋豪傑之隄而聖賢之
藪也爾諸生毋謂豐小毋謂學問之難庶幾於令無負哉

新建中陽書院記

明張榜

予嘗以民生於三義炳天壤而兼備于良守令之一身謂

豐縣志

卷十二

藝文類

四

記

其拊之咻之民胥以生也謂其誨之迪之嫻于文學澤于
道義天實有民俾師保之也謂其誨之成而何天之衢身
得顯焉志得行焉大君之薪楨而身之爵祿于此乎始基
也三道備良牧其選矣而吾以爲訓迪士類之尤亟也卽
如唐虞命官其受天之報者三焉禹平水土王于其身傳
祀四百契爲司徒十有四世湯克成之傳祀六百稷教播
種用集于武卜世七百以祚修短償與王之先後厥維均
哉然契之後王賢聖六七比封于宋中葉幾伯迄正考父
三命益恭至吾夫子而千萬億年之文教宗焉作人之報
之遠也則惟作人之功之宏以深也夫宋固契之裔而開
吾夫子之先者也而豐邑猶故宋之分土也異哉宋侯蒞

宋之故墟續契之遺教以恢吾夫子之緒也侯治豐吏乃
肅民乃乂乃進多士是誨是厲是程是肄猶念工有肆也
教有地也擇吉土而構之書院命之曰中陽余是以卜豐
士之日以昌而勲業之日以赫也夫豐厚也大也中陽者
日中也易之豐曰豐亨宜日中其象曰宜日中宜照天下
也照天下其文明之光乎日中必啟于日之升越明年爲
甲子甲日之始也越三年爲丁又越三年爲午皆日中象
也以是肇基天告厥祥矣故曰豐士日以昌而勲業日以
赫也豐士懋勉哉以無忝侯之式穀也

邑侯閻公生祠改建義學碑記

本朝 張逢宸 邑人

我侯治豐之五載政成人和士民具熙父老子弟相率卜

豐縣志

卷十二

藝文類

碑

記

地儒學之西爲祠祀公已又具壺漿酒食羣走縣堂捧擁
侯臨蒞祠中更進上壽爲歡已而侯愀然謂衆父老子弟
曰予不德幸無闕罪于若曹若曹祠祀我與而予一人有
壇坫曷若捐爲義學以嘉會後來而予與若曹併附以不
朽乎父老子弟辭弗獲侯遂延師聚生徒又蠲祠田七十
五畝爲義學田以餼其師及業儒之不能舉火者無何奉
有禁革生祠之

昔它郡邑立祠者皆倉皇撤毀而侯之義學已洋洋絃誦
非一日矣邑父老子弟感公之事而問記于宸宸固嘗辱
侯特達知不容辭書識謙益滿損而大易于謙盈之故自
天地鬼神以迄于人道蓋詳哉其言之矣今海內生祠是

不一處道

明旨一下或慚沮于過情或悵惘于剪拜我侯歆如不居超然論議成毀之外且助成

朝廷崇文廣厲之化豈不休哉嗣是以往位愈高而心愈下秩愈尊而氣愈卑事君則讓善處友則讓功同升則讓位語云惟其不居是以不去又云既以與人已愈有造物之所以申篤我侯者方來未艾書易所稱爲不誣矣且豐爲豪傑將相之鄉而近稍不競自我侯風之以學正蒙養而端幼儀豐人士當頓還舊觀而于古爲烈矣孰非侯讓德之所苞稽哉而或者謂侯德之被民其大者在革餅頭裁大戶遁馬官養錢糧官解等政皆因民之利百世永賴

豐縣志

卷十二

藝文類

三

記

今易祠而學明德奚所考據而輿情不皇皇如失乎宸曰唯唯否否夫侯旣歆如其不居矣豈以是數者見德乎魚相忘于江湖人相忘于道術豐人士之感而祠祠而忘愈以徵我侯之大也夫

創建樂育館記

國朝

顧惟楫

邑人

樂育者何所以廣錫類之仁也其館在縣治西通衢右首大門東向進則中門南向又進則正廳爲講堂中供文昌帝君像堂左有精舍進則有書齋又進則爲燕息堂皆諸生肄業之所左側爲爨厨其東北隅則爲僧人靜室以奉香火當途建木坊曰義學門首顏額曰樂育館輪奐聲奕爲邑鉅觀前此者非有是乃邑侯汝南王公所置也康熙

四十三年公來蒞豐越明年政通人和治具畢張闔邑沐公甘雨卜斯地欲爲公建生祠公聞而遜謝曰君子愛人以德曷宜有此若不獲已請建爲義塾聚諸生徒而教育之不爲美乎于是士民趨赴鳩工庀材公親戾止相度其規模既落成捐俸延師以興誦讀過其地者颯颯然入耳比于言氏武城之化既而來學者衆舍不能容公又陸續損俸增其式廓買田五十畝屬之館地以永爲學者資諸生貧者每周之度歲其遇考試則給以資斧甚有貧不能娶助之使畢姻焉嗟乎公之樂育人材若此其與大陵之長育微草巨舟之浮沈載物者奚以異焉昔橫渠張子作西銘以明同胞共與之道而殷殷于英才是育公之此舉

豐縣志

卷十二

藝文類

五十一

記

又何愧於錫類之仁哉推而廣之非獨可施于一邑也周子所謂天下善者當不外是至義塾肄業之餘又立月課公親爲指授耳提而面命之人人爭自濯磨以故學使者臨淮校士童子之獲雋者如卜源方文蔚于楠王朝瑞梁希賢孫世燾張應元崔元振崔其源皆館中士其他爲公所首拔而月課者居其半案發時淮上知而聞者彬彬稱絕盛焉而有志棘闈者公更爲之激揚鼓舞飲食教誨靡勸文運蔚興斷自公始然則公雖辭而不居豐之士人實俎豆公于無旣矣公諱初集號恕求乙卯科舉孝廉河南光州人也

崇福院碑記

明季春煦邑人

豐治西北三十里有丁庄集西爲崇福院下產卽古望德鄉也院肇於元祐二年修于大定元年至國朝成弘開院僧圓穩鄉耆楊環復重修之爾因築椽垣墉日就傾欹余岳父劉君大美慨然傷之於是鳩工掄材倡義士鄭樸輩捐貲以相成首建佛殿三楹東西廊各三楹大門三楹丹青燦爛金碧輝煌經營於戊戌春三月訖工於庚子冬十月廟成懇余爲記余以佛在西域猶夫子之在我中原也佛以慈仁感化羣生猶夫子以二帝三王之道扶持世教也佛自漢世以來其說愈熾下遍黎庶上逮王公猶夫子春秋至今而其理愈明卽日月之中天與江河行地也第佛以空寂夫子以易簡易簡之理在吾心是吾心固自有

豐縣志

卷十二

藝文類

至

記

真佛也愚夫愚婦不求佛於心而求佛于佛豈知一念善則景星慶雲一念惡則妖風厲鬼舍靈筮以入迷障蘇子所謂口裏彌陀胃中干戈者抑何舛耶若曰罪戾可以佛消福祉可以佛造則梁武宋徽至今爲天下笑而佛安在哉大抵佛者覆也不冒廣育之謂也誠以是心推之宇宙民物俾海隅蒼生鳥獸魚鱉昆蟲草木亦皆長養於大造渾渾噩噩卽葛天無懷之世何加焉吾儒又烏得而非之特以沿流忘源差毫釐而謬千里遂至于充塞仁義無父無君而不顧嗚呼可痛已余因崇福院之落成特記其事而併以告夫世之學佛者

重修邀帝城寺碑記

張逢宸 邑人

今天下佛宮道觀半於民居然而孽髡穢尼之所占處邪師妖覲之所窟穴村疇里婦之所奔走而祈請污穢二氏簧鼓羣趨奸王化而隕風教莫斯爲烈也則何如据壯槩標宿址崇先德而報宏功猶爲不忘本始習于忠厚之遺意哉邑故有邀帝城距縣治十五里蓋漢高帝帝業旣成歸宴父老而父老攀留之處也當漢盛時邑人榮其事卽其地築城中央建廟以祀高祖所從來舊矣不知何年廟易爲寺而廟貌與遺像俱蕩爲烏有余嘗遊邑東華山中峯帝廟巋然廟碑猶是而像設已非民俗之易惑而無識若此第華山祠廟猶爲義起推本山川篤生之意至若帝城寺廟爲高帝駐蹕加恩之區今之林林而居者夫孰非

豐縣志

卷十二

藝文類

五二

記

老父之苗裔詎忘之而易之也然雖廟易爲寺凡有心知無不過覽徘徊想見帝駕之留連父老之更進勸酬而若與之陟降于高原荒埵之上也寺之關係亦鉅哉兵荒以來寺漸衰落里人李君時勉等惻然曰夫廟易爲寺而不亾於寺無寺是無廟也廟不可驟復而寺可墟乎哉倡義鳩僝經始于丁亥孟春越孟夏告厥成事像設莊嚴視舊有加大殿廊廡以及鐘樓重垣鼎新齋飾規模畢具而又擇僧之謹厚者主之非復占處窟穴惑人而煽俗者是可尙也已一日李君等問記于余余固樂爲之表章而又推本寺之所由始及移易之故庶幾後之君子知帝廟之興有所觀感以慰李君之志云然吾鄉敦樸忠謹自值差徭

蝟與邑頗無聊李君等獨于困踣之餘節衣縮口孳孳義舉此邑民之易與爲治而居上之君子宜如何用心也哉因併告之採風者

裴侯德政碑記

明李星邑諭

當賢侯之澤被於民者旣深則人心之所以感之者雖至於千百年之久而亦不容少泯況未至千百年者耶山右澤州古愚裴翁正德丁丑歲來治豐究心民瘼勤勞撫字下車之且見四境蘆葦充塞寇竊屯聚於中翁卽命各里限期芟剪闢爲通衢彼顛越不逞之徒無所容匿遠方行旅因得以通販出入甫及旬月界上析疆分保立甲督民以力耕時耨及期豐之民悉皆饒裕學宮久壞士多曠業

豐縣志

卷十二

藝文類

五三

記

則曰養而弗教是予之責迺擇屬捐俸鳩工歛財學舍之傾圮者咸爲更新月朔望必開講盡日由是士皆知奮當時荷其教者多宿學力行之士豐之人有含冤困於重獄卽巡撫按官莫爲之白公至卽廉得其情乃申之上官用是開釋後獄者持數百金以謝翁曰吾之釋汝蓋法不容入也詎以私而出汝哉峻辭之獄者持金去縣治最下且近河公切憂之於是計其里甲丁民多寡命徒夫若干於城外築爲長堤以防洪水之至嘉靖五年河水大溢然猶幸其堤存水勢少緩雖多陷溺而居民得以遷走當時賴其全活者無慮數萬他如均差役而民不病於擾節經費而民不病於侈省刑杖而民不病於苛治邑六載無犯秋

毫善政種種更僕不能數嗚呼翁之治豐去五十餘載豐之父老及縉紳之顛白者誦翁之德政甚至於揮淚惻惻不忍忘是不惟可以見豐俗之厚而公澤之入於人亦豈淺淺者耶歲戊辰予來署豐教適尹侯以志屬之因識公之政甚悉故摘其實以記之

豹臺李公德政碑記

明熊彥臣 豫章人

惟豐沛古興王地當秦劉驅馳開匹夫召呼雲湧霆撼指顧駭異四塗翁會遂擅寶圖尊寵漬濡延及千裔王績所紀宏大英烈而豐沛之名至於今聞天下舊傳其土亢衍俗剽直好義長人者緣向酌利與之推移聲勸采迺罔不融液嘉靖丙戌夏五月黃河南決遂湮豐治官署巖壑瀾

豐縣志

卷十一

藝文類

齋

記

櫓閭閻困庾廩橐蕩爲汎濞官胥疾怖百徒喁喁上下膝析罔克莫止于是相率東依華山爰揭砰礮謀集新構而締植之羣陋未芟表儀攸闕淫祠更爲官治蘆棚祀爲聖宮生徒聚業息于墟肆廩庫靡宇墟而不支庶務委闡叢舛乖度衆用咨戚咸有興作之志而歷年滋遠上嬉下媮恒襲其舊殆非所以崇樹民觀而闡明王蹟者也辛丑豹臺李公始至覩而嘆曰是可以弗振乎哉斯吾職也乃躬自諏度宣導其志區方考物咸中厥謨別地之宜稽時之順協民之安先飭縣宇以麗政樞次創學舍以散彞典次建壇壝以綏神貺次立城障以備暴侮次分疆宅以治生養次建義倉以預賑給次開水道以資灌注次設養濟以

恤婺老次復學社以端幼儀次聯保甲以勗防守頒布訃諭懸準握衡與民更始民乃眷德僉曰惟公之智作而不匱旣奠我居唯公之仁來思無疆我方賴之昔時繁役今已蠲息昔時豪右今已屏歛公不搜捕其獄數款公不抗偏見者折容公無煦煦罔弗沾溉公之戾止我實有生吾公備德允宜於人宜人宜祿非吾公而何哉且聞之綏難以圖存者上之功也表德以永思者下之分也緣分釋功以明彰勸者言之司也矧公今日報政而遽舍我去矣烏能若是懇願相與述公政丐一言以刊金石俾我後之人其欽承於茲或曰公內修躬蹈未嘗干聞于人退而不援監牧益信其善上之薦剡遷且至矣而公曾無喜色今若是

豐縣志

卷三

藝文類

五

記

豈所欲哉僉曰公惠不靳我謀旣同用紀厥愛以表去後思公何與焉于是文學王銳等持狀來告予爲之言古道不復見於天下仕者惟糜餼食竊資譽以相競逐仕事而負謗者多矣如公者非古道歟漢興龐厚忠實論人之外牟融楊統于時最著而與王蹟輝映後先今有其人能思而言之豈非忠實之遺歟若公者其儔歟予因是而知豐人果好義者也公諱崇信楚之潛江人由正德己卯鄉薦豹臺其別號也因系之氏第勒以辭曰維豐攸宅上域房心吭徐襟宛交陸踞崑炎業所奮帝躅是欽綱維桓桓爲烈于今坤軸弗奠陵谷乃軼湯湯河流漚以浚澤溯蕩莫禦豐土斯汨黥氓疊踵厥燥爰適旣曰塾昧其燕不刊我

將疇依盡茲凋殘惟公來蘓拯溺燠寒百堵卽振爍若銀
珩公能居吾俾之有家公役不煩民亦罔譁量衡均石惠
我平嘉平嘉在民父母弗遐華山嵯嵯基震闢離以構以
室蕃聚于斯若施大帟若登廣遠整裳肅冕示我明師易
言厚下書志允懷公能勞之自黔其災凡此豐人洎于耆
孩歌公之德舉手蹋跽頓伏百祈願公繁祉永綏吾民克
紹漢軌公胡去吾莫或憑恃容績銓官鳴鼓報璽公不我
來願勒公德以告來裔以昭罔極古道于于皇工翼翼爰
卽堅珉允表銅墨

任侯去思碑記

明 崔元吉 金鄉知縣

嘗謂守令之賢舉於監司撫按者不若百姓所頌之爲切

豐縣志

卷十二

藝文類

五十六

記

頌於百姓者又不若合士民而永思弗諉者之爲真否則
誘之使勿讒且不可得况能令其頌而傳之耶矯飾於一
時以求其頌且不可得况能令其愈久而愈不忘耶若是
者正以守令爲親民之官過寬則民慢過猛則民殘狗故
與者失之拘貴通變者流于縱有心於爲士則於民或妨
有心於爲民則於士必畧善逢迎者雖疲民而弗顧務職
守者雖坑上而不知甚哉守令之難於稱也吉於嘉靖甲
子歲承乏碭邑一日以公事至豐時有義耆曹希文與語
邑中事甚悉因識焉戊辰歲復任金鄉去豐僅百里許希
文忽借邑士大夫十餘輩持其邑宰任君治蹟數十條乞
文以紀吉愕然迎諸君坐而言曰予何能文哉數辭不獲

廼跡其所具政績次後先而直紀之不能悉揚其美爲任君重吉竊媿焉任君諱惟賢爲古荊州黃陂世家領鄉薦於嘉靖丙寅歲奉命來豐英資睿質博學宏才抱經綸天下之具而暫試於一邑之小其施爲大畧爲豐之士民所習見聞者如君方下車卽環視於城之內外知邑民之久患於黃水也築堤以爲捍禦雖一仍其故址而增之使高輯之使固俾邑之民永免魚鱉之災者君之遺也然版築之費不煩貧民而功寔倍於昔君之權輿素定其少試諸此矣從此而爲政大略以漸修舉謂邑民始脫昏墊均可恤也而惟城南之民其罹患爲獨深乃招撫其流亡議蠲其租額而極貧如孫秀等五十餘家各給以耕牛籽粒瀆

豐縣志

卷十二

藝文類

五

記

於死者乃始甦焉於此復思學校爲根本之地崇禮師儒迥出常格蓋不徒爲齋廩之給歲時之遺而已也每月朔望諸生講書外更於三、八日講解經四、九日會文公親爲批閱生員趙科等十數人各給錢以爲饗殮燈火之資其他衣食之者又更多也民治唯訟獄爲甚大君乃聽之以公察之以明兩造俱具而片言卽折重門洞開曾不設隸民有事至得進告盡言如扣父母罪無大小而咸自裁決吏書莫能上下其手當其時有虞芮質成之風焉每日坐堂頃刻盡決唯閱書數幅而退卽委蛇矣人命至重非徒以爲飾怒之具也誤入不若誤出唯重不若唯輕每決重囚卽不勝憐恤人有以姪殺其叔者問者不察乃移罪於

生員高可攀繫獄已四年矣君一見案斷卽深思達旦若或啓之次日訊鞠姪乃引罪高始得脫徐州指揮華究輩負屈旣久爲之伸理出死者二十餘人人稱其爲神明焉時當道諸公欲修華山河口君獨不允移文三責之而君之神色自若士民乃爲之驚怖請各捐貲爲修之君諭之曰浚萬民之膏血而委之必不可成之地吾何惜此一官而忍爲此乎後滕縣張尹在平陶尹修築未成俱爲黃水所衝由此當道諸公始信其有真見焉他若於僚屬則聯之以情於士大夫則接之以禮撫百姓則以恩馭胥吏則以法僉差役則悉照丁產曾不假手於下人遇疑難則親爲裁決曾不與謀於羣小其養之豫故其施之也隆其見豐縣志

卷十二

藝文類

五六

記

之也真故其行之也決蒞政踰年而誦之士民有同聲焉釋政數年而思之士民有同心焉去之日士民數千人送之河濱哭聲震地此豈可以偶致之者哉吉因豐士民之言知君之治豐良法美意無日不見之臨馭間雖古之循良無以加此且其中淵然冲然汪汪千頃未易涯測又美於民之外吉因之而得一師焉乃忘其陋樂談一二以見士民去思之由俾觀之者復徵其所遺以掄揚於道側卽病吉之紀爲不文又何尤焉是爲記

主簿曹公德政碑記

元康安道

粵自嬴秦郡縣天下縣置令丞而漢有主簿廼統一縣之政益簿之職勾稽省署之條目糾正縣務之從違令佐理

者官得其人則勾稽審錄之盡其力糾繩豪橫之奉其法
令丞之政不勞而辦也如其不然下而民庶欲被恩施上
而令長欲成理道蓋亦難矣考之漢仇香繆彤唐李畚徐
浩皆公選一時之秀所以能勝其任豐之爲縣旣久來任
簿者衆矣最得民者沂州曹君其人也君名簡字士廉前
吉州知州奉訓公詢之子也幼而聰明長而勤敏進爲國
子以其甄陶人物獎拔後進改授將士郎大都路平準庫
使秩滿調豐縣簿始至之日急公務絕私交近善人遠讒
賢奉上以敬御下以寬律已以廉待人以信視小如大子
大德丙午秩滿已酉星移物換已臻瓜期縣人俟積田青
等乃謀於衆曰以曹君恤軍保民爲政之德鑄諸石庶幾
豐縣志

卷十一

藝文類

一

記

激勸來者衆諾其請迺錄其治績自豐來徵予友予不獲
辭夫君之佐治也視館舍敝陋什器缺壞而增補之視橋
梁漂沒道路崩潰而修治之留順積潦滄沒民田君爲疏
濬而播種之給散單父之賑濟老幼咸均賑糴濟州之官
糧公私兩便至於屏盜賊決爭訟皆君之餘事耳若挾夫
祖父之勲業者馳騁射獵酣酒嗜音以快一時之樂迺能
孝弟於家仁愛於物奉公執法小民寅畏而不少倦如是
哉夫以君之才智使置身於廟廊之上何用而不可抑何施
而不堪忠君澤民以顯功一時重名百代亦君之優爲也
旣序其事迺因縣人之請而爲之歌曰豐之爲縣古邦畿
來任簿者咸得宜未若曹君政績奇至公至正心無私與

舉學校厚民彛務勤稼穡憂民飢六曹羣吏不忍欺追呼
急赴無愆期訟堂處政宣仁慈持身舉步仍謙卑倉廩館
廡几廢壞君皆著力勤修治親善遠惡無阻疑凡有動作
真良規枳棘難棲鸞鳳姿鹽梅調鼎待君爲來時里巷喧
童兒去日滂沱涕泗垂豐碑大字鐫歌詞縣人要比甘棠
詩

李學師去思碑

明張盛治 邑人

鑑虛李師以萬曆乙未年掌豐諭至乙亥年陞蜀宣撫授
五年於茲矣去德滋遠思德滋深於是明經程士選博士
弟子員李春光等相携命予曰鑑虛李師振鐸而士興起
遺澤而人思之吾儕欲勒石學宮以志弗諼有成言矣乃

豐縣志

卷三

藝文類

李

記

今始克舉也子其記焉予曰知師莫若弟諸君之記也奚
若於是兢起而頌曰吾師乎吾師乎母論春風鼓鬯化雨
惟時其誨迪也有不剔腸剝腑罄其識以相指授者乎其
志潔行芳也諸生起貢起復幫補入學一切束修之贄有
屑屑者乎其規過揚媿日惇惇也卽學使者惠文彈治甚
嚴而斷斷乎寧以優進母以劣進士有不爭自濯磨者乎
其趨人之急也不腆之俸不足以供伏臘而資可藉無間
券矣有因以爲利者乎師之懿行大都如是子以爲奚若
予曰唯唯蔑以加矣嘗讀周禮太宰以九兩繫邦國之民
三日師以賢得民而後世楊子釋之曰師者人之模範也
自嗟老嘆卑之士出溺其職久矣若李師者所謂賢而無

愧模範者歟以此教豐振鐸而士興起遺澤而人思之五
年一日也令世之司教者盡若是其興起士類而繫屬人
心者當何如師道其有與乎是不可以不記諸士曰唯唯
遂舉而書之石李師諱洛金陵之淳水人鑑虛其別號云

免料碑記

沙元賢

邑庠生

從來興利除害之舉必賴有人焉制良法寓美意創之于
前尤賴有人焉循舊例播新恩繼之于後夫如是奕禩而
遙乃霑德澤于無已也我豐彈丸小邑僻處北鄙計地祇
萬餘頃編戶僅十九里舊有黃河之險民虞供億之繁厥
後河雖南遷購辦未除一經採買烟變幾絕且也百里轉
輸大妨民業則豐民之不能安枕者視黃河在豐之日爲

豐縣志

卷十二

藝文類

空

記

甚康熙二十二年士民僉議捐置公田七十餘頃籲縣詳
請入官栽植柳園長供河料冀除採辦之苦維時邑宰孫
公俯念民艱恩準詳請河憲靳大司空仰體

聖祖仁皇帝子惠元元之至意兼以豐民委曲奉公之心
破格題免永爲定例地雖在官賦仍在民闔邑編戶以輸
賦之誠代急公之職蓋五十年相安如一日矣自我

皇上御極以來河清海晏中外安瀾猶以河患難防特
簡稽大司空底定南邦績繼禹功元圭將錫更虞衝決靡
常修儲宜豫癸丑之冬濱河汎辨並及豐邑我侯魏公撫
茲黎民素如保赤乃循成例委婉詳求河憲嘉其肫切准
將所發帑金仍歸河庫自茲以往民累永除矣因憶首創

成規者襄平孫邑侯之遺愛也破格題免者河憲靳文襄公之曠典也徹國帑以播新恩者大學士嵇大人也其諄諄懇懇援舊例以詳請永免者實賴我侯魏公也斯時也閭邑士民擊土鼓而樂康衢熙熙于堯天舜日之中咸頌父母師保後先輝映大有造于我豐如是者爰請勒石以垂不朽亦使後之人處茲樂土毋忘沐恩之所自也因列姓氏里居以誌焉

雍正十一年免料之役元賢實司其事多與勞績故列是文以為急公者勸

鳧鷖亭詩序

宋姚雲

豐縣公宇之背子城之東隅有亭其上曰四望舊矣治平三年錢塘關公彥長以進士來宰是邑視事之暇而登覽焉病其榱棟欄楯之朽敗不足以蔽風雨而延賓客也於是易新今名而完壯之又作詩其上以賦其事豐人嘉誦而喜傳者方領曳裾之外閨門稚子林野匹夫同之於戲何其聲譽之琅琅也嚶三十餘年單父馬公以世胄之賢爲令是縣愛其陂池游衍魚鳥出沒有江湖之態菱荷菱茨有清適之境佳木秀竹有山林之氣又嘉公能寫詠其事而傳遺後人也於是迭出新意以廣和之言約而義豐辭勻而意遠不戾於古不愧於今信乎與作者同風也豐

豐縣志

卷十二

藝文類

奎

序

人安公之政而嘉公之詠樂與二公之詩俱傳不朽故特鐫於石以久歲月而且屬雲序之於是遂書云

豐縣古今考叙

明史孟麟宜興

豐縣考志豐也豐之來尙矣春秋爲蕭叔大心封國例得埒于附庸秦夷而爲縣則始皇帝東游厭氣者也自赤帝子提三尺斬蛇逐鹿掃秦灰而噓火烈而豐遂爲天子粉榆鄉遷其父老子弟於長安里號新豐如其故豐天下諸郡邑曾不得望寵焉而豐之名始大歷晉唐宋元沿革遞變我太祖高皇帝起鳳泗混一區宇隸豐于徐泗與徐盈盈黃河衣帶間則所謂南北豐也其地四戰無崇山巨鎮之雄且河囂汴泗諸水激而南徙而豐實受其委故田里

桑麻雖稱沃饒而時蹂于戎馬汨于洪濤其民務本力穡
敦尙醇朴而負氣好勁多燕趙骯髒俠烈之風其俗崇儒
慕學彬彬隣于鄒魯而鐵馬金戈之遺若有餘壯焉是以
故老之傳聞若存若亡載籍之覩記若滅若沒孔子言夏
殷而慨文獻之無徵其在斯乎其在斯乎學博季公豐之
博洽君子也抱良史才嘉惠桑梓深懷杞宋之懼乃搜剔
遺事銓訂見聞綜核其本末作古今考爲目三十有八而
輿地而形勝而財賦而物華而人英靡不燦然臚列間附
心裁要以徵信非以傳疑至治河議尤詳哉其言之公豈
直爲豐計乎夫黃河吞噬淮泗震動陵寢廟堂焦心蒿目
傾縣官左藏貲付治河使者驅赤子於波臣浩瀚中而頻
豐縣志

卷十一

藝文類

畬

序

堤頻決束手告艱倘得先生之三策并有形無形之議而
孰籌之庶其有濟焉公于是書真鐵搥三折矣謂一邑之
信史也可謂經世之碩畫也可豐以公不朽公亦以豐不
朽矣公爲郡博士提躬潔而與人仁亦猶行古之道也讀
豐考而志更在千古故因其請而爲之弁其首云

豐邑古今考叙

明張盛治 邑人

宇宙稱不朽者三曰立德曰立功曰立言夫言之而無當
於實際則德功不借靈于齒頰也言而本於學問以發乎
性命之端達乎古今國家民社經綸之旨則立言而功德
備焉言固可少乎余入豐來得古今考一書詳閱之不覺
掩卷而歎曰是固爲豐立言而欲不朽此豐者哉豐與其

言俱壽矣蓋不徒以豐紀豐而上自星野以迄古今沿革
災祥之異官制里域形勝風俗之殊山水亭臺變遷之象
田賦祭祀書籍人物升降之圖參之以十一議矢口而談
俱成石畫而一段憂國憂民之苦心溢于言表是書也懸
之國門當不易一字豈但餘年經幾丹鉛而帙纍纍矣曩
秉鐸晉陵出以示今相國玉繩周先生先生方言采芹也
卽服膺而欲壽諸梓會季先生有歷陽之行無何弃世此
物此志幾與人俱湮又二十餘年周先生在揆席其家子
完赤往謁焉語次及之亟命歸而卒業完赤謂余事先生
久魯魚亥豕當稍加參定役旣竣完赤將挈以報命乃先
問序於余余曰子過矣此行黃扉一言足詒青箱九鼎何
豐縣志

卷十二

藝文類

奎

序

有于余然或者曰文章者經國大業不朽盛事季先生書
成於四十餘年之後其板行也又二十餘年生平幾湮之
緒借周先生始終之將不朽者託經國以必傳倘亦有天
幸焉所謂文章有神交有道非但閭巷之人附青雲之士
如太史公所云也遂書以爲古今考序

王儒士妻齊氏貞烈序

明史可傳 邑人

烈婦非婦人也古忠臣義士流轉而現筭禕身者也如果
婦人乎耳不領保傳之訓目不覩女憲之文一旦判人鬼
之關明大義而著竒節吾知其難哉然且情不出於係戀
而勢不起於迫促獨以夫婦之倫不可廢也而視死如歸
視人生如輕塵棲弱草卽士人誦法詩書審于節義者不

可必得而可望華年弱質之女也今凝社王生聞齊民故
是閨中之秀婉孌有志操乃凝社委禽未幾竟以端方自
遠無何凝社捐館舍矣甫四日而氏甘雉經以殉此何爲
者豈刑于雅化從一而終乎抑琴瑟靜好聯袂入地乎然
而四年以來凝社情牽帷勝內好弗專氏亦僅僅執巾櫛
供蘋蘩束修其身而已且於其卒也咋指以視飯含盟心
而決死所遂以其間托白練以自盡于靈座之右天下有
從容慷慨以道御情以禮制欲如氏者乎蓋其心寒松貞
石烈日秋霜不趨矣以此樹人綱人紀卽以此扶天柱地
維豈不稱真女中丈夫冠纓而現笄禕身者哉故曰烈婦
非婦人也况前此氏有女弟字卜某某亦不幸殞於水女

志

卷十二

藝文類

李

序

弟繼之與之俱投清流焉一門雙節千古爭烈尤難矣余
故併表而出之以候夫秉如椽者采焉

史烈婦傳序

明許暢江寧

心之精神集于霄漢則爲喬雲爲飴露集于山川則爲珠
爲玉爲金爲碧集于草木則連理之木九葉之芝集于生
人則道德英華貞良節烈故雖閨門淑媛毅然獨成其是
齊彭殤一死生有舉世笑爲愚而不顧者豈非其神凝故
物莫之奪耶吾友吳子正持好奇如子長從古豐來以史
烈婦傳相示余一再讀之欽其從容中道秉如結之心安
行于倉卒而莫測其端也夫夫者天也烈婦早喪厥天旣
無遺孤可撫以下報九原設此未亡之人視息宇宙母乃

爲附贅懸疣卽令弗決絕于此時不幸而再罹兵燹則定有毀面斷臂投崖赴壑之事不亦紛紛其多異乎然迫而後慷慨自裁孰若早決者之悠游暇豫乎觀其製襪服焚明器拜姑託母悉散笥篋餘積迄于投纆之頃能令侍兒肅稟治命中規中矩如此諒彼平日之嫻內儀端身範克勤中饋靜好琴瑟槩可推矣惜乎史郎之促與偕亾不獲展其所未竟耳嗚呼人孰無死以大運較之卽多活數十年猶旦夕間爾今天壤之大其隱忍苟存敗名辱行者雖謂之不死奚益而巾幗中廼有烈婦其人者精神凝結千載而下生氣長存泰山鴻毛其于輕重何如哉正持之傳成闡幽表蘊字挾風霜異日上爲實錄用光史冊固烈婦

豐縣志

卷十二

藝文類

七

序

芳規之不可掩而吾友崇獎正義扶植綱常之心亦炳如已是爲序

王雲樵先生德政序 講元本字立齋 四川瀘州人

方曉

蓋聞邵杜殊勲由賢良方正之選龔黃令績皆詩書
樂之遺杏苑探花種名花於一縣蕊宮奪錦耀美錦於
七襄知通經為致用之原亦修己即治人之本也恭維
雲樵先生饗纓世胄珠樹華宗代有青箱家傳治譜對
芙蓉之明鏡姓字早寫紅牋樹桃李於春官印綬親承
丹陛才非百里且試雷封志在層霄權息江縣乃於辛卯
之歲握篆來豐楊柳青旗蘇長公勸農之地牧童春雨
杜樊川買醉之鄉維時序失庚晴膏屯戊雨易耰鋤以
竿挺襍耒耜於菑符倘利器不施將蟠根彌固欲彈佩
刀之俗遠成買犢之風恐非羽扇之所能揮蒲鞭之可

豐縣志

卷十二

藝文類

序

立化矣乃公下車伊始薤急拔其根豪強斂跡草毋使
之蔓良懦安眠緩急酌宜寬嚴相濟范希文以工佐食
遇變能通陳良佐勸富捐金袁多益寡穿殷渠之水青
蚨之子母皆飛築白傅之堤紅腐之常平畢散花銜鳳
篆詳書鹿洞之規葉聽蠶聲親試鷺湖之院訟庭花落
鳴琴仍是書生深室塵封斷獄居然老吏蓋明能照物
寶鏡芒寒淡不染塵玉壺冰澈處脂膏而不潤銘几杖
以自防催租來紅杏之村清風滿袖明志變貪泉之水
白璧無瑕茲當里巷歌謠士民騰躍張潭標慈母之號
蔡謨喧朗伯之稱每思歌咏之難名益信推施之無既
行看流膏日渥共泡水以俱長福蔭雲高與華山而並

壽謀采佳石爲文翁刊胃禁之碑先製聯屏向卓茂上
感恩之序

豐縣志

卷三

藝文類

又七

序

漢高祖銘

漢班固

皇矣漢祖纂堯之緒實天生德聰明神武秦人不綱網陋於楚爰茲發跡斷蛇奮旅神母告符朱旗乃舉粵蹈秦郊嬰來稽首革命創制三章是紀應天順民五星同晷項氏畔渙出我巴漢西土宅心戰士憤怨乘釁而運席卷三秦割據山河保此懷民股肱蕭曹社稷是經瓜牙信布腹心良平恭行天罰赫赫明明

漢高祖廟銘

漢班固

後漢光武建武二年封蓋延安平侯伐劉永遂定沛修高祖廟置嗇夫祝宰樂人祀十八侯于佐班固為之銘

皇皇聖漢兆自沛豐乾降著符精感赤龍承魁流裔襲唐

豐縣志

卷十二

藝文類

突

銘

末風寸木尺土無埃斯亭建號宣基維以沛公揚威斬龍金精摧傷涉關陵郊係獲秦王鴻門造勢斗壁納忠天期乘祚受爵漢中勒陳東征剗擒三秦靈威神祐鴻溝是乘漢軍改歌楚眾易心誅項討羽諸夏以康陳張畫策蕭勃翼終出爵褒賢列土封功炎火之德彌光以明源清流潔本盛木榮叙將十八贊述股肱休助顯祚永永無疆國家寧安我君是升根生葉茂舊邑是仍於皇舊亭菑嗣是承天之福祐萬年是興右高祖銘兢兢相國建策不追御國維綱秉統樞機文昌四友漢有蕭何序功第一受封於鄗右贊侯蕭何懿懿太尉醇厚樸誠輔翼受命應節御營歷位卿相土國兼并見危致命社稷以寧右絳侯周勃銘

相趙距呂志安君身微詣行在如意不全天秩邑土勛乃

永存右汾陰侯周昌銘桓桓將軍威宣細柳亂平七國功垂不朽

批鱗觸忌解綬歸田勅賜豐碑鎮此陌阡右條侯周亞夫銘邑邑

將軍育養烝徒建謀正直行不匿邪入軍討逆頂定天都

佩雀雙印百里為家右青陽侯王吸銘不產豐者其銘不錄

厭氣臺銘并序

宋王禹偁

古之王者築靈臺視雲物察氣候之吉凶知政教之善惡苟理合天道垂休降福則必日新其德以奉之化失民心為妖作沴則必夕惕其躬以懼之如是則變禍福而反災祥不為難矣烏有築高臺厭王氣行巫覡之事禦天地之災者乎嬴政之有天下也始以利嘴長距雞鬪六國而擅

豐縣志

卷十二

藝文類

六

銘

場復以鈎爪鋸牙虎噬萬方而擇肉終以多藏厚歛蠶食兆民而富國然後成五嶺築阿房驅周孔之書盡付回錄惑神仙之術但崇力士收大半之賦則黔首豆分用參夷之刑則赭衣櫛比鯨鯢國政螻蟻人命原膏野血風腥雨膾六國嗷嗷上訴求主天將使民息肩於炎漢故望氣者云東南有天子氣於是祖龍巡狩築臺以厭之殊不知民厭秦也訴之於天天厭秦也授之於漢秦獨厭天厭民而自王乎向使築是臺告天引咎遷善樹德封六國之嗣復萬民之業薄賦歛省徭役銷戈兵最稼穡除高斯之暴政修唐虞之墜典下從人望上答天意則王氣不厭而自銷矣劉項之族何由而興哉某游豐沛之間過臺之舊址思

古覽今悵然有懷灑翰濡毫遂爲銘曰臺之築兮救秦之
衰厥之不得爲漢之基氣之厥兮慮漢之昌厥之不得速
秦之亡秦之厥漢其惟一 身漢之厥秦乃有萬民高臺巍
峩王氣氤氳秦政已矣漢德惟新泱泱前古茫茫後塵故
國蕪沒荒臺草萊行人環竦惻愴斯文

李氏世德銘

宋李淑

高邱播靈我宗顯承冠冕北州才華代興相惟豐方橋梓
所憑二京迭貫駿祿是膺爰初三葉含章匪擘盤桓不辰
訓子七葉太傅順履儒賢吏師中書博聞賓榮士義命有
屯亨道有磷繼慶叢善貽裕我身支累朝襍飾衮黼絕奕
衍封脂田賁寵泉安子孫繩繩望慕恍惕勒銘表阡世德
豐縣志

卷十二

藝文類

七

銘

無斃

箒草銘

明張爵 知縣

汝亦草屬俗呼爲掃帚草因汝掃而得名汝始有意於吾
故生於吾庭吾故愛汝欲常接汝於目以掃除爲吾民害
者而其最先以掃除吾心

瓜銘

裴爵

瓜田納履君子避之嗚呼凡人避嫌者皆內不足也夷齊
至清假使飲盜泉而亦不易其心其內若足則亦何嫌疑
之避之足云汝蓋爲吾所避乎不然何以生吾庭

蕭何頌

晉陸機

堂堂蕭公王跡是因綢繆睿后無競維人外濟六師內撫
三秦拔奇夷難邁德振民體國垂制上穆下親名蓋羣后
是謂宗臣

盧綰頌

陸機

盧綰自微婉變我皇跨功踰德祚爾輝章人之貪禍甯為
亂亡

劉賈頌

陸機

蕭蕭荆王董我王軍我圖四方殷薦其勲庸親祚勞舊楚
是分往踐厥宇大啟淮瀆

周勃頌

陸機

豐縣志

卷十一

藝文類

十一

頌

絳侯質木多畧寡言曾是忠勇惟帝攸歎雲鶩靈丘景逸
上蘭平代禽豨奄有燕韓寧亂以武斃呂以權滌穢紫宮
徵帝太原實維大尉劉宗以安挾功震主自古所難勲耀
上代身終下藩

周苛頌

陸機

周苛慷慨心若懷冰形可以暴志不可凌貞軌既沒亮跡
以升帝疇爾庸後嗣是膺

豐庠四頌

明蔡岳佐 邑人

天啟神聖廟貌受靈黃水漲溢梁木俱傾裴侯來茲命工
適新美哉輪奐不日告成

堂曰明倫五教攸敷文廟既作斯堂是圖上有師傅下列

生徒講焉習焉開此蓁蕪

學有齋舍師弟是集奠厥攸居日新厥德或相游衍或相朝夕上下咸宜裴侯之績

賢哉裴侯建此學宮聖域是闢賢關以崇俗由以美治由以隆百年于茲歸侯之功

漢高祖贊

司馬遷

太史公曰夏之政忠忠之敝小人以野故殷人承之以敬敬之敝小人以鬼故周人承之以文文之敝小人以僣故救僣莫若以忠三王之道若循環終而復始周秦之間可謂文敝矣秦政不改反酷刑法豈不繆乎故漢興承敝易變使人不倦得天統矣朝以十月車服黃屋左纛葬長陵

索隱述贊曰

高祖初起始自徒中言從泗上卽號沛公嘯命豪傑奮發材雄彤雲鬱碣素靈告豐龍變星聚蛇分徑空項氏主命負約棄功王我巴蜀實憤于衷三秦旣北五兵遂東汜水卽位咸陽築宮威加四海還歌大風

豐縣志

卷十二

藝文類

七十三

贊

高祖贊

班固

贊曰春秋晉史蔡墨有言陶唐氏旣衰其後有劉累學擾龍事孔甲范氏其後也而大夫范宣子亦曰祖自虞以上爲陶唐氏在夏爲御龍氏在商爲豕韋氏在周爲唐社氏晉主夏盟爲范氏范氏爲晉士師魯文公世奔秦後歸于晉其處者爲劉氏劉向云戰國時劉氏自秦獲於魏秦滅魏遷大梁都于豐故周市說雍齒曰豐故梁徙也是以頌高祖云漢帝本系出自唐帝降及于周在秦作劉涉魏而東遂爲豐公豐公蓋太上皇父其遷曰淺墳墓在豐鮮焉及高祖卽位置祠祀官則有秦晉梁荆之巫世祠天地綴之以祀豈不信哉由是推之漢承堯運德祚已盛斷蛇著

符旗幟上赤協于火德自然之應得天統矣

荆王賈燕王澤吳王濞贊

班固

贊曰荆王王也由漢初定天下未集故雖疏屬以策為王鎮江淮之間劉澤發於田生權激呂氏然卒南面稱孤者三世事發相重豈不危哉吳王擅山海之利能薄歛以使其眾逆亂之萌自其子興古者諸侯不過百里山海不以封蓋防此矣鼂錯為國遂慮禍反及身毋為權首將受其咎豈謂錯哉

索隱述贊曰

劉賈初從首定三秦既渡白馬遂圍壽春始迎黥布絕間周殷賞功胙土與楚為隣營陵始爵勲由擊陳田生遊說

豐縣志

卷十二

藝文類

七

贊

受賜千斤權激諸呂事發榮身徙封傳嗣亡於郢人
酈侯蕭何贊
司馬遷

太史公曰蕭相國何於秦時為刀筆吏錄錄未有奇節及漢興依日月之末光何謹守管鑰因民之疾奉法順流與之更始淮陰黥布等皆以誅滅而何之勲爛焉位冠羣臣聲施後世與閔天散宜生等爭烈矣

索隱述贊曰

蕭何為吏文而無害及佐興王舉宗從沛關中既守轉輸是賴漢軍屢疲秦兵必會約法可久收圖可大指獸發蹤其功實最政稱畫一居乃非泰繼絕寵勤式旌礪帶

酈侯蕭何贊

司馬遷

太史公曰吾適豐沛問其遺老觀故蕭曹樊噲滕公之家及其素異哉所聞方其鼓刀屠狗賣繒之時豈自知附驥之尾垂名漢庭德流子孫哉余與他廣通爲言高祖功臣之興時若此云

絳侯周勃贊

附條侯亞夫贊

司馬遷

太史公曰絳侯周勃始爲布衣時鄙樸人也才能不過凡庸及從高祖定天下在將相位諸呂欲作亂勃匡國家難復之乎正雖伊尹周公何以加哉亞夫之用兵持威重執堅刃穰苴曷有加焉足已而不學守節不遜終以窮困悲夫

索隱述贊曰

豐縣志

卷十二

藝文類

十五

贊

絳侯佐漢質厚敦篤始擊碭東亦圍尸北所攻必取所討咸克陳豨伏誅滅荼破國事居送往推功伏德列侯就第太尉下獄繼相條侯紹封平曲惜哉賢將父子代辱

漢盧縮贊

司馬遷

太史公曰韓信盧縮非素積德累善之世徼一時權變以詐力成功遭漢初定故得列地南面稱孤內見疑疆大外倚蠻貊以爲援是以日疏自危事窮智困卒赴匈奴豈不哀哉陳豨梁人其少時數稱慕魏公子及將軍守邊招致賓客而下士名聲過實周昌疑之疵瑕頗起懼禍及身邪人進說遠陷無道於戲悲夫夫計之生熟成敗於人也深矣

索隱述贊曰

韓襄遺孽始從漢中剖符南面徙邑北通頽當歸國龍額
有功盧綰親愛羣臣莫同舊燕是王東胡計窮

豐縣志

卷五

藝文類

七

贊

王氏貞烈傳

明張瑋晉陵

嘗讀古貞烈事夥矣大率要之以死人卽百年死等死耳而故促以爲名曰吾死貞吾死烈是不然匹婦有志不可奪也當其求死不獲視四大如懸癰如附贅如怨賊之不可不殺早一刻則愉快甚而又知死貞死烈爲高議者顧曰慷慨殺身易嗚呼偷生者多無惑也人當恒時拔一髮而心動折一瓜而色變髮瓜之于身細大懸矣殺身易也曷不反思甚耶秦臺孫子涕而揖余曰日天降割於孫也奪余弟來穀婦余弟也者王氏女也號哭不絕聲姊妯譬之百方如弗聞也夜自縊榻前殮旬日眠之如生焉婦爲弟也死敢乞言於先生以不死若婦余聞之慟也余襁而

豐縣志

卷十二

藝文類

七

傳

失先君子余母陳撫藐諸孤垂二十年心血耗竭卒盡瘁死死等耳爲余母者庚苦庚難然終弗敢謂殺身易也王之殉也以無子不蚤殉必有謂少年何自苦以他語聒者吾縱有心如曰不辱吾耳耶以故視其身如懸癰如附贅如怨賊之不可不殺而不能須臾待也貞哉烈哉而匪促之以爲名曰死貞死烈也曰若是則且旌且廟非耶曰國有典矣孰烈烈而黯黯何以愧偷生者實與有責王之死也博士弟子聞之邑令邑令上之按臣疏請于朝令甲煥若孰得而混諸孫子父鍾台公以貢司鐸括蒼敦厚有至誼署邑篆以能稱孫子名式穀從余游兄弟彬彬以文起吁都哉集爲王氏彰者遠矣贊曰有生而枯有死而華豈

無令姿委如空花碎之逾完凶之逾嘉闢風者悼過里者式誰秉無彛匪識不識懷二心者其類有泚曰貞曰良敢告君子

李氏貞烈傳

明史可傳 邑人

李氏彭城李文學紹第女也十六齡歸朱中翰次子焜焜以業儒攻苦日就疋羸天啓五年四月初五日遂不起於時血胤雖斬周歲之女在抱門族雖衰素饒之家可依氏少濡忍乎昔也桓少君今也梁高行矣而氏不爲是屑屑也水漿不入口者七日至第八日得間以雉經死炎月候殮久之面如生縣令聞之遂上其事于天子于是褒獎有加焉邑人史可傳曰余覽靖難事殉節諸人如方希直黃

豐縣志

卷十二 藝文類

七

傳

瀾伯尚矣至河西傭之披葛東湖樵之負薪補鍋匠之寄居觀其慷慨行吟百折不回以立奇節何自苦乃爾耶李氏豈聞風而興起者歟雖然爲方黃易爲傭樵難爲傭樵易爲李氏難余固表而出之以告秉筆者

太學生王贊卿格神傳

王初集

自古建邦啟土設立郡縣必崇祀城隍者蓋以其能福善禍淫默施感應亦先王神道設教之意從未聞善卽降祥赫赫在人耳目間若豐邑之城隍有最著者邑有太學生王之御字贊卿幼失怙奉母訓惟謹能自樹立父雖沒終日拜跪供飲饌儼如生存尤篤於友愛門內無間言至比閭族黨一旦緩急相告輒傾囊拯濟無幾微吝色更恪恭

事神凡邑內有祠宇傾圯者必竭力葺舊維新先是城隍廟久頽廢正殿迴廊不蔽風雨康熙十五年贊卿捐金錢鳩工庀材重修正殿及兩廡增繪神像金碧輝煌規模自是宏遠矣是時贊卿年六十尙未舉子處之泊如迨康熙十九年七月望後有王魁高者久客廟中神忽附其體自持格鏹刺腰間堅不可拔士民盡驚愕莫知所措魁高忽作神巫語曰城隍憐贊卿王善人修德不倦已賜以一子必王善人至始可去鏹已而贊卿果以生子故赴廟拜謝魁高之鏹忽自躍出絕無血痕衆共奇之聞于邑令孫公名其子曰大善及長字以格天卽今之候選州同王所善也贊卿愈樂善不倦享年七十有二今且生孫十餘齡將

豐縣志

卷十二

藝文類

李九

傳

來之邁種而繩祖武者更未可量天之報施善人爲何如哉古積功累行之君子不可得而覲已比如伏處蓬戶好讀書修循謹飭之行敬神樂施不啻治家人生產業當時僉稱善人蓋亦有足多者獨是寸善片長聲施鄉曲非與化被區宇澤及蒼生者可同年而語卽使鬼神未必降福後嗣未必繁興此亦事之無可如何者然而王生積善於身食報旣已彰彰若是則世有蒙祖父積深累厚之庇而翼翼小心以敬承之不以善小而不爲不以惡小而爲之遵守法度不敢貪墨者不又可以自信以信天也乎余來尹茲邑不及見贊卿見其子恂恂醇樸知有乃父風一日爲余述軼事因援筆作傳使後之爲善者知所感奮云

袁氏墓誌銘

元姚燧 柳城

袁氏以元貞丙申冬十月卜新阡于居邑東華山之西麓
厝其高曾祖考妣凡六喪越十五寒暑當至大庚戌曾孫
遵道銜其父珪命述累世遷徙求銘先德爲叙之曰高祖
某宋季居海州贛榆縣力穡後遷沂之費縣曾祖通魁岸
力絕人任俠不羈嘗殺徐州牧家童賈暴悖爲民害者時
金錄趨訖法禁已弛王郡義而原其坐起家爲吏有能名
竟投筆去耕于費之鄙娶宋氏一子清徙太安奉符縣河
北搶攘未靖餓殍載道嘗有振恤志限以無位卒不克施
遂攻醫爲活人計娶劉氏一子鈞醫道益精詣徙家豐今
爲豐縣人娶王氏四子璧珪瑄皆以醫爲業珪居華山

豐縣志

卷十二

藝文類

墓誌銘

之陽舍南有桑外密中虛色蕤蕤望之如燕鵲巢見者嗟
異目曰巢見桑桃二有烏構巢孳育其上巢作鹵形日夕
飛鳴上下如與人相周旋家人雖以物驅嚇不去也芝生
于庭五色扶疏類人指掌爪甲具時稱三瑞國子祭酒劉
公標名其堂以爲活人之徵娶朱氏宋氏三子遵道遵義
遵禮四女璧娶呂氏三子好敬好義好古三女瑄娶侯氏
四子熙敬熙仁熙文熙載女如之瑄娶張氏許氏二子必
大必昇三女撮其男女男十有二人女多二人再世而下
將不百人而止也遵道繇成均陞吏部吏且梯此爲代美
官維古醫師隸冢宰歲終稽其全失以制其食後之爲醫
各業全與失無所於稽古世多札瘥昔人以藥之用猶兵

之用兵藥固不可同苟弗精其爲殺人一而已道家忌三世將者非以其殺人之多也耶袁氏業醫累世不惟其子孫蕃衍盛大而禽鳥草木之祥有如此者詎非活人之明驗歟因銘其阡故詳論之銘曰惟古醫師冢宰是隸其全與失厥有成制後之爲醫各業其業嗟嗟天民罹此凶折於惟袁氏醫業三世活人之徵動植表異宜其子孫暨暨誥誥受其報施施如活人盤盤東山業業其麓有碑方跌永揭穹躅

瀘南守王公墓誌銘

明唐釋虹縣

公世系浙之山陰人高祖考諱宗純肇慶守妣劉氏贈陽江縣君曾祖考諱繼美嶺南節度副史妣林氏贈朝陽郡

豐縣志

卷十一

藝文類

全墓誌銘

君祖考諱椿字永華元御史中丞光祿大夫太子太保柱國兼兵部尙書贈太傅封越國公謚文英妣孫氏封越國公夫人俱塋秦望山之陽至厥考諱賢舉字相國延祐乙卯科進士張起岩榜第四人累官濟寧路總管府總管妣方氏贈濟陰郡夫人至正末因占籍于豐叔考諱舜舉字虞賢福建道宣尉使司副都元帥叔考諱仁舉字景賢燕南道廉方司副使顯融中外爲縉紳重時稱王氏三麟公諱正字惟中自少刻苦讀書爲詩文高古嘗隱居教授爲士林推服我太祖應天出治凡中外重臣必悉簡拔其人以任之宋公景濂特以公明經薦拜翰林院孔目後出守四川瀘州在官自食蔬菜出祿以給孤貧請設儒學惟導

民以孝悌親身勸課農桑愛賢育民調嘉定州刊孝經小學諸書分諸州縣鄉鎮子弟誦讀導民行冠婚喪祭禮民從其化洪武丁巳詔下雲南四川兩廣係邊隅重地藩臬守令廉能者暫留固守其地待時陞擢惟加旌異各進階二級祿公進階朝議大夫至洪武庚申致仕號秋林隱老每與鄉人遊觀娛樂內外清白始終一節生于元大德癸卯十月五日卒于洪武壬戌十二月七日歲八十妣徐氏少公二歲先一年卒子二人曰疇薦判定興縣簿曰度年甫成童二女一適泉州府判邑人白金次適邑庠生梁學疇欲葬其考妣擇癸亥十二月十二日卜縣城西三十里泡河之南爲塋建以祠廟葺以垣墻遂間銘于予予惟公

豐縣志

卷十二

藝文類

三

墓志銘

之生有益家國聞訃之日莫不太息詹同有思君頻入夢老眼淚空揮高啟有南國甘棠在黎民嘆未休諸詩則公之生平亦概可知矣嗚呼世之人難得者時今公爲郡守難得者子今有子爲縣且立石於塋而垂諸後俾百世子孫知祖宗本源之意其接武前修與祖宗增輝出色斯不負立石之義云銘曰縣城之西泡河之南王氏塋域百世相堪推之本源浙之山陰祖登太傅喬梓森森鍾秀河岳三麟挺生乃文乃武實國之英公幕翰苑出守名州視諸祖考接武前修遇明天子保全始終厥後子孫景仰高風今日公卒生榮死哀訃音南北悼彼清才繼承賢嗣克振家聲旣爲祠廟有垣斯成春秋祭祀神人以和勒銘于石

永久弗磨

袁處士墓誌銘

萬壽祺 徐州

處士諱存讓字謙冲後更名允豐縣人曾祖諱櫻業儒起家爲邑庠生再傳至臨川公諱學儒以碩德舉鄉飲賓處士其少子也先明神廟年間海內平成日久吏治寬舒無徭役追呼兵戎寇盜之警又豐爲河北沃野臨川公勤苦稼穡慎蓄洩歲入頗饒處士承藉豐腴得以恣所交遊方兒時出就外塾遇同學貧乏者館穀筆楮靡弗周恤識者已知其令器矣稍長益自揮脫廣施予朋友媼戚吉凶賓嘉之費徃徃賴以成立者更僕未易數也昔齊國人待晏子舉火馬文淵散貨殖以贍六親皆善用其有餘以推恩

豐縣志

卷十二 藝文類

三 墓誌銘

于不報處士能之誰謂當今之世遂無古人耶處士有兄三人伯無子耽林居不與人事處士順適其意所以事之者甚謹仲以邑庠援例遊南雍旅食常不足處士時時助之季謁選京師處士傾囊資給未嘗分彼此計酬直夫陸機愛弟韓康育生當時以爲懿行方之處士彼豈得專美乎處士生于萬曆某年月日卒于天啟某年月日以某年月日葬于城西趙庄之原壽三十八歲人疑天之報施善人頗不永然余嘗考袁氏之族莫盛于東漢世世三公爲漢名臣及原其發祥則邵公理獄一事實陰植之今處士急病讓夷無愧家修天之報施之者安知非留不盡之福澤徐及子孫與東漢袁氏共其休寵也顧早暮不同耳難

爲計效目前者道也處士原配高氏繼娶趙氏生二子二女處士旣沒氏孀居十六年延名師訓諸孤次子本厚補邑庠弟子員績學勵行爲時望所歸氏之力也然益見處士之刑于矣氏以萬曆某年月日生以崇禎某年月日卒以某年月日二子奉其柩與處士合葬本厚念其先處士之賢若此而闡幽無文雖美弗彰特乞言樹石以表其墓嗚呼此真孝子所有事者哉故審所述以勒之碑焉銘曰奕奕嶽靈河濟之交粉榆披秀隆阜堯堯烟草光澤綴厥星辰是紛是翕產茲碩人系傳名閎躬韜隱德春英秋實告成稼穡惠于朋友富而不私鵲鷦在原曾莫忍遺鷄鳴昧旦綠窓靜琴藍田植玉鳳驚懷音雲中翠芝未霜先折

豐縣志

卷十二

藝文類

古

墓誌銘

楚老悲臨薰膏欲絕我聞令則睠彼一丘考實發潛挾藻闡幽雉兔旣馴松楸斯拱花陰邨陂珠埋劍隴煌煌片碣金碧追琢質文初宣苔荆未剝丹篆菁華寒陵風雨伏臘踟躕曾孫維主樹爲樞社陵成谷神客玉匠文千載聿新故文學雅持孫君墓誌銘

國朝

徐元文

崑山

豐邑介青徐間土厚而水深徭賦輕平物俗醅樸人士有古君子之風余嘗客游其地所與往還者以孫氏爲最孫生谷宗之交余益稔習知其家世乃承命爲誌其父墓焉谷宗父諱操字雅持邑庠諸生明之季年四境多盜戮力守陴保衛鄉里旣而以身殉事豐之人至今稱道不忘康熙三年月日谷宗奉父母柩葬於邑韓村寺之南嗟乎非

獨孫君烈士可傳凡其世澤皆有足紀者也君天資剛正人不敢干以非義雅好文學少時嘗脫身走吳門執經求友彌年忘歸亦不通家問父念之篤躬至吳索得君乃以歸其間學專摯如此君之讀書慨然思見之力行不屑屑章句舉動進退輒準古禮于家之上下恩意周篤而體貌如君師內外之人無不愛而敬之家饒於貲不爲私蓄嘗賑人不給周人患難雖平生或不相識苟以事請必奔走贈與無少靳家以日貧視人之急若在已躬慷慨赴義畧不自顧惜其倉猝遇難亦以此古所稱殺身成仁者孫君其有之哉然君固儒者退然以禮自持不矜赫赫之行非如任俠者流矯匹夫之節要譽鄉曲也博學有文章而不

豐縣志

卷十二

藝文類

金 墓誌銘

得志於有司負其才氣以徇鄉里之急沒而思頌於人亦可哀也巳配盛氏孫君旣亡舅衰且屬疾能上奉甘旨下撫幼弱晨夕不懈舅亡時檢省遺業告於伯仲曰孀婦將孤子多藏非福也苟有以延師教子令不墮世業足矣因廬何計爲悼孫君之亾六年而沒病亟時語谷宗曰汝世祖世父皆慈惠有守我死汝不慮無依倚也昔遇難時家奴張弘秀負汝逃死不去其背者三日夜慎無忘之嗚呼生死之際人所不能強持昭昭冥冥出於無意盛孺人之明德卽其臨沒之數言而生平可概見矣孫君祖諱應元字洪川樂善好施嘗作菴廬孔道飲食往來乏絕者男子三長向璧次燦又次章撫視谷宗絕有恩義燦字耀然卽

孫君之父也性純孝葬父母後守墓所者十許年當饑歲有廩麥三百石商持厚直請糴不可曰計吾家口留食餘者賑贍里人何以多金爲也教子義方故孫君旣以名節著聞而其弟廷琦捷名世皆敦志厲行爲名諸生守父兄之學嗟乎孫氏之世澤其足紀者蓋如此谷宗名學海太學生娶聶氏其上世蓋先儒子張顥孫氏後人乃去顥而稱孫云銘曰顥孫華胄延綿至今鬱乎佳城近接孔林爰有奇士邦家之琛才則未究實靖乃心是藏金璧以及瑟琴民所瞻式神所照臨永百世遠式保斯岑

光祿大夫太子少保兵部尙書直隸總督謚敏達又

玠李公墓誌銘

國朝 張廷玉 桐城

豐縣志

卷十二

藝文類

八六

墓誌銘

國家運際昌隆必有奇偉不羣之人挺生其間以副翼爲明聽之任其識足以理勞其才足以集事其精誠足以結主知而展經濟用能上下交孚懋膺

宸眷功績紀於旂常聲名垂於竹帛存榮歿哀卓乎不朽者於太子少保兵部尙書直隸總督謚敏達李公見之矣按狀公諱衛字又玠先世在明初以軍功世襲錦衣衛由常山遷居豐曾祖諱從任祖諱藻考諱宗靖皆以公貴贈如其官曾祖妣皇甫祖妣闕並 贈一品夫人妣汪封一品太夫人初太夫人方孕夢神僧授寶器而生公脅骨三輪鼻孔中通狀貌瓌瑋十歲而孤哀毀若成人及長才氣橫逸識量軒豁生平讀書不求甚解而所過目則終

身不忘尤銳意經世之務遂以國子生就選兵部武選司員外郎裁定案例賄請不行陽城田文端公時爲少司馬一見器之曰非常才也此席他日屬君矣閱二載陞戶部廣西司郎中事遇紛糾長官恒委裁決悉合條理奉聖祖仁皇帝命勘山東礦廠力陳不可 詔已之山西旱饑從高安朱文端公奉 命賑濟悉心籌畫全活無算所過郡邑雖盤殮之饋不受文端公以才能敏幹操守清廉薦公

上面諭九卿曰曹郎實心任事如李衛者蓋無幾人 特授直隸巡道旋以撫臣題留前任道員仍回部曹而

聖祖仁皇帝固心眷注公矣

豐縣志

卷十二

藝文類

八七

慕誌銘

世宗憲皇帝嗣位授爲雲南鹽驛道廓清積弊 御批奏牘有剛直居心莅事忠誠勤敏之褒旋陞雲南布政使仍管鹽驛道事兼管通省銅廠請制府兵勦定三苗 特給兩代封典 賜御書公勤廉幹匾額隨有浙江巡撫之命入見 賜花翎公會以母病乞歸省故令就近得迎養親灑宸翰永錫康寧四大字及參貂文綺俾爲母壽人以爲榮測省地接海疆公整肅紀綱申嚴條約有司皆凜凜奉職無敢違越時塩務海塘俱歸兼理所興革利弊不能殫述更爲紓南米賸墊轉派之累清文錢江漲沙起科以抵仁錢兩邑攤賠丁額隨事規畫所向風行又行順庄均田役法革數百年里書圖甲之弊豪猾無所容而逋賦

頓清動帑金三十萬糴米蜀中分發諸州縣常平倉之缺額者餘貯省城永濟倉以備平糴適奉截南漕以資閩省之命公請卽以所存川米資之不待徵漕而事集繼又因淮宿水災請以餘米轉輸平糴咸報可公之隨機應變公忠無我皆類此也丁未晉階總督管巡撫事兼鹽政並管理江蘇諸府州督捕事前此未有委任彌隆公愈自刻勵昧爽而起夜分不寐思所以報効

天子公素嫻武藝每操演兵旅登壇指揮軍容甚盛江洋多盜出沒於江浙交界太湖之間公廉得其姓名居址適江南巡查御史王君肅章抵任公移扎密商陽與巡察會界上而潛遣兵役躡賊不三日積匪咸獲無一漏網者其

豐縣志

卷十二

藝文類

全八

墓誌銘

他盜賊渠魁或以操舟江上殺越人于貨或以僧裝投宿祠廟中夜內外響應黨羽數百人公密令搜捕咸服厥辜又除黃河濱積賊及奸捕私梟之爲民害者從此東南數千里無盜賊之警公之發奸摘伏如神多類此督權南北海三關衡量百貨酌定規則刊木榜立關前辦銅東洋從乍舖出口首日向多挾貨居竒公告諭以天朝威德倭皆頽首順命以故銅額無缺至若疏西湖淤塞以資灌溉葺前賢祠以志景仰築城玉環山聽民耕種以重海疆修舉廢墮瀨人士大悅服已酉奉召入朝日賜尙方珍饈命遊覽御園遣畫工圖公狀貌以示眷異晉階兵部尙書回任中途聞太夫人訃命在任守制給假營葬

公具疏懇請終喪 溫旨慰留尋加太子少保辛未再入朝 命在軍機處行走乘馬入 紫禁城旋署刑部尚書 每日批閱堂稿累年積案

世宗憲皇帝念畿輔重地公賢能可整飭遂 命爲直隸總督合省提鎮悉受節制公馳歷塞外查閱邊防足軍實 練武勇於保定募兵二千悉成勁旅整肅官吏請設大名 兵備道以重彈壓復請以巡道事務歸各河道領之屬員 有廉幹而因公呈誤者請予錄用劾去其貪懦吏賞罰明 信人皆思奮郡邑定擬招案必反復研究人以不寬畿南 飛賊積窩密訪捕戮三輔咸稱神明更捐養廉以益書院 諸生膏火百務修舉其措置不異撫浙時而幾務愈紛處

豐縣志

卷十二 藝文類

八十九

墓誌銘

之愈裕

世宗憲皇帝常褒異焉 賜賚不可勝紀先是西陲用兵 請効力行間不允甲寅貴州苗蠢動請以長子星垣從軍 尋以奏捷不果行而公感激報効之誠亦可見也

世宗憲皇帝龍馭上賓公入朝哭臨極哀

皇上召見寢殿 賜以

先帝所遺朝珠雜佩還任 命兼管直隸總河公往返三 千里周歷永定河東西兩淀及運河海口應修築開濬者 以聞報可丁巳畿輔望雨

上宵旰焦勞公奉請停徵減糶留漕貯穀諸事 詔卽施 行其秋奉 命賑濟沾惠甚渥更貸麥種籽粒以濟民之

無力耕種者戊午秋復苦雨奉 命發倉給帑散賑被淹
旂民咸得安堵雖連遇歉歲而民以不饑而公以河工賑
卹諸務亦漸積勞成疾是歲八月

皇上展謁

秦陵公以扈從入朝疾作而回

上急遣太醫診視 頒賜內府參藥旋准解任調治未幾
而公竟以疾逝矣遺疏聞

上傷悼久之稱公累任封疆實心辦事勇往直前無所瞻
顧遣內大臣馳往酌奠茶酒喪還 命所過郡縣有司奠
醴護送詔禮臣議卹典以聞 賜公謚曰敏達公敷歷內
外二十餘年生平所建立設施卓卓可稱述且受 三朝

豐縣志

卷三

藝文類

卒 墓誌銘

知遇之恩爲自古人臣所未有其才識過人而精誠感動
天眷足以彰公生平之大畧而不朽於後世矣公兄衡早
卒禮事寡嫂以子星垣爲後義田千畝爲族人公產捐地
五頃入徐州義學又嘗散粟賑荒此皆可稱道者公生于
康熙二十七年正月初一日終于乾隆三年十月二十二
日年五十有一元配張氏 誥贈一品夫人繼配王氏
誥封一品夫人子五長星垣丙辰武進士一甲第三人
御前二等侍衛嗣兄後星聚廕生現任戶部雲南司員外
郎星照戊午副榜貢生星曜附監生星福尚幼女四俱適
名族孫男四光裕光朝光顯光隆孫女五人將以十月二
十二日葬公于縣南楊家集之 賜塋其孤奉狀請銘其

隧道之石予不獲辭爰系以銘曰雲龍蜿蜒篤生人傑凌
瑋倣倜卓冠朝列發軔郎署洊歷藩宣建牙秉鉞厥猷茂
焉

帝任股肱國資幹濟契合一心用深倚毗民之疾苦條列
井陳

天子曰俞令下如春直前不撓眷顧彌隆夙夜盡瘁以勵
匪躬 三朝榮遇九列華階 褒賜寵賚超軼倫儕備極
哀榮易名示後於爍 王綸表彰不朽佳城葱鬱不荷
龍光勒銘徵信永世無忘

禱雨文

閩 詔知縣

詔清齋修醮率衆禱雨凡二十日矣禱之次日而卽感天神俯應師伯效靈大雨如注夜以繼日詔私慶幸謂民得生不料所被自城至野不逾十里四境旱荒無所裨益詔不敢怠煩瀆不已徇輿論而邀術士襲常規而勤雩祀日者雲四布而風卽烈夜欲雨而晝已晴禾苗在地相繼稿落粟麥告匱價以高騰伏念旱荒之災先不止豐頃聞鄰郡俱沐甘霖何豐不祿猶在遭屯嗚呼詔俯仰熟慮罔測天意謂民積愆應受饑寒蚩蚩血氣未免愚顛况乎前此已多艱難尙乞洪造普與赦原謂官無德天怒以干一人有罪譴責無延或減其筭或褫其官願以身當免民顛連

豐縣志

卷十二 藝文類

九十二

禱雨

謂係劫數應爾苦厄詔列下土幽明道隔惟神尊威左右帝側委曲拯救丕彰大德嗚呼年景及今已傷過半延久卽雨莫救荒旱惟神鑒察速賜旋轉詔身在湯火憂焦如焚情屬急迫呼不擇音謹再叩禱

甲戌之夏余承命令茲豐邑明年寇自秦楚突如其來濠梁金斗之間騷然糜爛漸且漫躡隣疆距我郊鄙予因策寇得奔軼無禁繫惟是馳驅倏忽而出人不意已耳爰督鄉勇阻兵河涘設濟而半渡邀擊之掃除可翹足待偶或以一矢相加遺則堅壁清野以待逸禦勞主加客終將爲我擒當是時寇之欲投鞭飛渡者亦屢矣度不獲逞緣折狡謀會王師四集乃踉蹌遁去諸紳士相與嬉嬉色喜酌盃觴舉慶余戚然憂之曰不敏茲幸藉諸先生父老得固圉無恐雖然臨事則倉皇予已事則怡然苟且古今來所以啓戎心挫師失守恒必繇之且今者未大創寇也必

豐縣志

卷十二

藝文類

九十三

志

復來復來而奄至豐之門也單脫有以枚數闔者如何竊倣名城大邑設重門護之盍爲我圖諸可乎諸紳士固疑信半夫斯亦何足疑莒一日而被克於楚君子以爲無備恃德不以險老生常談不可用也值冰霜之威者必襲狐貉之溫羸餘之家旣謹緘滕慎扃鑰矣復爲之高其垣藩密其戶牖厚固而曲防焉此無智愚知之則奈何其信于小而疑於大信於近而疑於遠耶越一歲寇果復來果有以不戒膺殘戮者諸紳士然後疑釋而信是役之不可已謀諸學博趙先生先生曰俞休哉請諸道臺鶴洲徐公公曰俞徃究哉嗟乎令之難也志不通于上則莫爲之主情不達于下則莫爲之輔莫爲輔之莫爲主之利有所不得

興害有所不得去然欲福生民者猶然獨排群議奮不顧
怨誓以底厥初志矧余今日上有徐公下有趙先生暨諸
紳士既不虞於無所主復不虞於無所輔也又曷爲忌而
泄泄哉以是首先捐俸倡義聞風樂成而輦助者途相屬
鳩工庀材課程董力朱生 崔生連雲肩焉朱尉科左右
焉旬有越月告厥終事翼翼將將巍巍赫赫猗歟壯歟猶
栗膚之更裘而室處者之多所籬蔽今而後得高枕也已
誠使繼之者而思首事之隱憂也肇造之維艱也衆力之
拮据也以德輔此有基勿壞斯不佞志也夫



